

Na osnovu člana 22. Statuta Brčko distrikta Bosne i Hercegovine (“Službeni glasnik Brčko distrikta Bosne i Hercegovine” broj: 2/10 – prečišćeni tekst), Skupština Brčko distrikta Bosne i Hercegovine, na _____ sjednici održanoj dana _____, usvaja

ZAKON
O ZAŠTITI ŽIVOTNE SREDINE U BRČKO DISTRIKTU BOSNE I HERCEGOVINE

DIO PRVI - OSNOVNE ODREDBE

Član 1.
(Predmet)

Zakonom o zaštiti životne sredine (u daljem tekstu: zakon) propisuje se obaveza zaštite životne sredine radi njenog očuvanja, smanjenja rizika po život i zdravlje ljudi, osiguranja i poboljšanja kvaliteta života, zaštita komponenti životne sredine, informisanje i pristup informacijama u oblasti zaštite životne sredine, planiranje zaštite životne sredine, strateška procjena uticaja, procjena uticaja na životnu sredinu, postupak izdavanja ekološke dozvole, sprečavanje nesreća velikih razmjera, sistem eko-označavanja, upravljanje zaštitom životne sredine, finansiranje aktivnosti u vezi sa životnom sredinom, odgovornost za štetu nanесenu životnoj sredini, kao i prava i obaveze pravnih i fizičkih lica koja obavljaju djelatnosti propisane ovim zakonom.

Član 2.
(Definicije)

Pojedini izrazi upotrijebljeni u ovom zakonu imaju sljedeće značenje:

- a) „**biološka raznovrsnost**“ je sveukupnost živih organizama koji su sastavni dio ekoloških sistema (u daljem tekstu: biodiverzitet);
- b) „**emisija**“ je direktno ili indirektno ispuštanje supstanci, vibracija, toplote ili buke u vazduh, vodu ili zemljište iz pojedinačnih ili difuznih izvora u postrojenju;
- c) „**imisija**“ je koncentracija supstanci u određenom mjestu, u određenom vremenu u okolišu;
- d) „**životna sredina**“ je prirodno okruženje organizama i njihovih zajednica uključujući i čovjeka koje omogućava njihovo postojanje i dalji razvoj kao što je vazduh, zemljište, voda, energija, kao i okruženje koje je stvorio čovjek;
- e) „**zagađivanje**“ je direktno ili indirektno ispuštanje supstanci ovog stava, vibracija, toplote ili buke u vazduh, vodu ili zemljište izazvano ljudskom aktivnošću koje može biti štetno po zdravlje ljudi ili kvalitet životne sredine;
- f) „**zagađivač**“ je svako fizičko ili pravno lice koje direktinim ili indirektnim djelovanjem ili propuštanjem djelovanja izaziva zagađivanje životne sredina;
- g) „**zainteresovana javnost**“ je javnost na koju utiče ili bi moglo uticati donošenje odluka o izdavanju, obnavljanju, reviziji ili definisanju uvjeta procjene uticaja na životnu sredinu i izdavaju odgovarajućih odobrenja i dozvola;
- h) „**zaštita životne sredine**“ podrazumijeva odgovarajuće djelatnosti i mjere koje imaju za cilj prevenciju od opasnosti, štete ili zagađivanja životne sredine, smanjenje i otklanjanje štete koja je nastala, i vraćanje na prijašnje stanje;

- i) **„promjena u radu“** je promjena u funkcionisanju postrojenja, ili proširenje postrojenja koje može imati negativan uticaj na životnu sredinu;
- j) **„javnost“** obuhvata jedno ili više fizičkih ili pravnih lica, udruženja, organizacije ili neformalne grupe;
- k) **„komponente životne sredine“** su zemljište, vazduh, voda, biosfera, kao i izgrađena životna sredina koja je nastala kao rezultat djelatnosti ljudskog faktora i sastavni je dio životne sredine;
- l) **„korištenje životne sredine“** je svaka djelatnost koja izaziva promjene u životnoj sredini;
- m) **„monitoring životne sredine“** je sistem praćenja stanja životne sredine, emisija i imisija;
- n) **„nesreća velikih razmjera“** je emisija većih razmjera, požar ili eksplozija usljed nekontrolisanih promjena u radu postrojenja koja predstavlja ozbiljnu opasnost po zdravlje ljudi ili životnu sredinu, neposrednu ili odgođenu, unutar ili izvan postrojenja, a koja uključuje jednu ili više opasnih supstanci;
- o) **„plan sprečavanja nesreća velikih razmjera“** je plan upravljanja i organizacije rada, identifikacije i procjene opasnosti, nadzora rada, planiranja interventnih mjera i sprovođenja monitoringa, koji se donosi u cilju sprečavanja uticaja nesreća velikih razmjera na ljude i životnu sredinu;
- p) **„opasna supstanca“** je supstanca, mješavina supstanci ili preparat koji je prisutan kao proizvod, nusproizvod, talog ili međuproizvod, uključujući i one supstance za koje je osnovano očekivati da bi mogle nastati u slučaju nesreće;
- r) **„opterećivanje životne sredine“** je emisija opasnih supstanci ili energije u životnu sredinu;
- s) **„procjena uticaja na životnu sredinu“** je stručna procjena direktnog i indirektnog uticaja projekta na ljude, biljni i životinjski svijet, gljive, zemljište, vodu, vazduh, klimu i pejzaž, materijalna dobra i kulturno nasljeđe i njihovo međusobno djelovanje;
- t) **„operater“** je titular ekološke dozvole odnosno pravno ili fizičko lice koje obavlja ili nadzire djelatnost radi koje je dužno osigurati da pogoni i postrojenja budu izgrađeni i funkcionišu saglasno ovom zakonu ili pravno ili fizičko lice na koje je preneseno ovlaštenje donošenja ekonomskih odluka o tehničkom funkcionisanju pogona ili postrojenja;
- u) **„postrojenje“** podrazumijeva jednu ili više tehničkih jedinica na jednom mjestu u kojima se obavlja djelatnost koja može imati negativne uticaje na životnu sredinu;
- v) **„prirodni resurs“** je komponenta životne sredine, odnosno sastavni dio prirodne životne sredine koji se može koristiti da bi se zadovoljile potrebe društva, izuzev vještačke sredine;
- z) **„standard kvaliteta životne sredine“** je propisani standard koji se odnosi na kvalitet svih komponenti životne sredine;
- aa) **„supstanca“** je bilo koji hemijski element i njegova jedinjenja, uz izuzetak radioaktivnih supstanci, genetski modificovanih mikroorganizama i organizama čija se upotreba reguliše posebnim propisom;
- bb) **„uticaj na životnu sredinu“** je promjena u životnoj sredini nastala korištenjem i opterećivanjem životne sredine.

Član 3.

(Supsidijarna primjena zakona)

Na pitanja koja nisu propisana ovim zakonom, primjenjuje se Zakon o upravnom postupku Brčko distrikta Bosne i Hercegovine.

DIO DRUGI – ZAŠTITA ŽIVOTNE SREDINE

POGLAVLJE I - CILJ I NAČELA ZAŠTITE ŽIVOTNE SREDINE

Član 4. (Cilj)

Ciljevi Zakona su:

- a) smanjenje korištenja, sprečavanje opterećivanja, zagađenja i narušavanja životne sredine, kao i mjere poboljšanja i obnove životne sredine;
- b) zaštita ljudskog zdravlja i kvaliteta života;
- c) očuvanje i zaštita prirodnih resursa, racionalnog korištenja i obnove resursa;
- d) međunarodna saradnja u oblasti zaštite životne sredine;
- e) razvoj privrede u skladu sa propisanim standardima za zaštitu životne sredine; i
- f) uspostavljanje institucija za zaštitu i očuvanje životne sredine.

Član 5. (Pravo na život u zdravoj životnoj sredini)

Svako lice ima pravo na život u zdravoj i ekološki prihvatljivoj životnoj sredini, i dužnost je svakog pojedinca da zaštiti i poboljša životnu sredinu.

Član 6. (Zaštita i unapređenje životne sredine)

(1) Zaštitu i unapređenje životne sredine obezbjeđuju u okviru svojih ovlaštenja Brčko distrikt Bosne i Hercegovine (u daljem tekstu: Distrikt), preduzeća, preduzetnici, kao i druga pravna i fizička lica.

(2) Distrikt uspostavlja saradnju i koordinaciju u okvirima zajedničkih ciljeva i interesa zaštite životne sredine sa institucijama Bosne i Hercegovine, Republike Srpske i Federacije Bosne i Hercegovine.

(3) Distrikt učestvuje u međunarodnoj saradnji u oblasti zaštite životne sredine.

Član 7. (Načela zaštite životne sredine)

Načela zaštite životne sredine su:

- a) načelo održivog razvoja;
- b) načelo predostrožnosti i prevencije;
- c) načelo zamjene;
- d) načelo integralnog pristupa;
- e) načelo saradnje i podjele odgovornosti;
- f) načelo učešća javnosti i pristupa informacijama; i
- g) načelo zagađivač plaća.

Član 8. (Načelo održivog razvoja)

Načelo održivog razvoja životne sredine podrazumijeva preduzimanje radnji u cilju:

- a) očuvanja prirodnih resursa izvan okvira prirodne nadoknade;

- b) očuvanja neobnovljivih resursa izvan okvira utvrđenih zaliha;
- c) sprečavanja emitovanja zagađujućih materija izvan mogućnosti vazduha, vode i zemljišta da ih apsorbuje i preradi; i
- d) stalnog očuvanja biodiverziteta, ljudskog zdravlja, kvaliteta vazduha, vode i zemljišta, prema standardima koji su potrebni za očuvanje života ljudi, biljnog i životinjskog svijeta i gljiva.

Član 9.

(Načelo predostrožnosti i prevencije)

- (1) Načelo predostrožnosti i prevencije podrazumijeva korištenje prirodnih resursa sa najnižim mogućim stepenom opterećenja u cilju sprečavanja zagađivanja životne sredine i ponovnim korištenjem prirodnih i vještačkih materijala.
- (2) Kada prijete opasnost od nepopravljive štete po životnu sredinu, nedostatak naučne podloge ne može biti razlog za odgađanje uvođenja mjera predostrožnosti i prevencije da bi se spriječila dalja degradacija životne sredine.
- (3) Korištenje životne sredine organizuje se i obavlja na način koji:
 - a) rezultira najnižim mogućim stepenom opterećivanja i korištenja životne sredine;
 - b) sprečava zagađivanje životne sredine; i
 - c) sprečava štetu po životnu sredinu.
- (4) Pri korištenju životne sredine mora se ispoštovati načelo predostrožnosti odnosno pažljivo upravljati i ekonomično koristiti komponente životne sredine, te svesti na najmanju moguću mjeru stvaranje otpada primjenom reciklaže nastalog otpada odnosno ponovnim korištenjem prirodnih i vještačkih materijala.
- (5) Korisnik životne sredine koji izaziva opasnost po životnu sredinu ili uzrokuje štetu po životnu sredinu dužan je da odmah obustavi radnju koja predstavlja opasnost ili uzrokuje štetu.
- (6) Ukoliko je šteta nastala kao posljedica dosadašnjih djelatnosti korisnika, korisnik je dužan da u što kraćem roku ukloni i popravi nastalu štetu u životnoj sredini.

Član 10.

(Načelo zamjene)

- (1) Načelo zamjene podrazumijeva zamjenu tehnologije koja bi mogla da ima štetne posljedice po životnu sredinu sa tehnologijom koja predstavlja znatno manji rizik od opasnosti.
- (2) Svaku djelatnost koja bi mogla da ima štetne posljedice po životnu sredinu potrebno je prilagoditi propisanim ograničenjima u pogledu uticaja na životnu sredinu.
- (3) Prilagođavanje djelatnosti obavlja se i u slučaju da su troškovi prilagođavanja veći od vrijednosti koju treba zaštititi.

(4) Odredbe iz stava (2) i (3) ovog člana primjenjuju se pri upotrebi proizvoda, postrojenja, dijelova postrojenja, opreme i primjene proizvodnih procesa uz obavezno ograničavanje zagađenja životne sredine na izvoru.

Član 11. **(Načelo integralnog pristupa)**

(1) Zahtjevi za visokim nivoom zaštite životne sredine i poboljšanjem kvaliteta životne sredine sastavni su dio svih politika kojima je cilj razvoj životne sredine, a osiguravaju se u skladu sa načelom održivog razvoja.

(2) Svrha načela integralnog pristupa je sprečavanje ili svođenje na najmanju moguću mjeru rizika od štete po životnu sredinu u cjelosti.

(3) Načelo integralnog pristupa podrazumijeva:

- a) praćenje cijelog životnog ciklusa supstanci i proizvoda;
- b) procjenu posljedica u komponentama životne sredine kao rezultata djelovanja supstanci;
- c) svođenje nastanka otpada i štetnog djelovanja otpada na najmanju moguću mjeru;
- d) primjenu opštih metoda za procjenjivanje i poređenje problema u životnoj sredini; i
- e) primjenu mjera u odnosu na posljedice, poput kvalitativnih ciljeva zaštite životne sredine i mjera usmjerenih ka izvorima kada su u pitanju emisije.

Član 12. **(Načelo saradnje i podjele odgovornosti)**

(1) Načelo saradnje i podjele odgovornosti podrazumijeva saradnju, kom prilikom se zajedničkim djelovanjem i podjelom odgovornosti svih subjekata u okviru svojih nadležnosti, postiže održivi razvoj životne sredine.

(2) Provođenje ciljeva vezanih za životnu sredinu ostvaruje se saradnjom sa nadležnim institucijama Bosne i Hercegovine, nadležnima institucijama Federacije Bosne i Hercegovine i Republike Srpske (u daljem tekstu: institucije Entiteta) i nadležnim tijelima susjednih država saglasno bilateralnim ili multilateralnim međunarodnim sporazumima o zaštiti životne sredine, kao i pružanjem informacija i pomoći u vezi zaštite životne sredine.

Član 13. **(Načelo učešća javnosti i pristupa informacijama)**

(1) Načelo učešća javnosti i pristupa informacijama podrazumijeva pravo zainteresovane javnosti na pristup informacijama koje se odnose na pitanja zaštite životne sredine i učešća u postupcima koji se vode u skladu sa ovim zakonom ili drugim propisima.

(2) Svaki pojedinac i organizacija moraju imati odgovarajući pristup informacijama koje se odnose na životnu sredinu, a kojima raspolazu organi uprave i upravne organizacije, uključujući i informacije o opasnim supstancama i djelatnostima u njihovim zajednicama kao i mogućnost učešća u donošenju odluka.

(3) Organi koji donose propise i tijela nadležna za zaštitu životne sredine su dužni pomagati i razvijati svijest javnosti kao i poticati učešće u odlučivanju omogućujući dostupnost informacija.

(4) Javnost ima pravo učestvovati u postupcima u skladu sa odredbama ovog Zakona ili drugim propisima.

(5) Sa ciljem postizanja pravne zaštite ili obeštećenja, svaka zainteresovana strana ima pravo na zaštitu u upravnim i sudskim postupcima.

(6) Svaki pojedinac ima pravo na jednak pristup informacijama o životnoj sredini, bez obzira na spol, dob, vjersku i rasnu pripadnost.

Član 14. (Načelo zagađivač plaća)

(1) Načelo zagađivač plaća podrazumijeva da zagađivač snosi ukupne troškove mjera za sprečavanje i smanjivanje zagađivanja koji uključuju troškove monitoringa, otklanjanja rizika po životnu sredinu i otklanjanja štete nanese životnoj sredini.

(2) Zagađivač, iz stava (1) ovog člana, je odgovoran za sve djelatnosti koje imaju uticaja na životnu sredinu u skladu sa ovim Zakonom i drugim propisima.

POGLAVLJE II - ZAŠTITA KOMPONENTI ŽIVOTNE SREDINE

Član 15. (Najbolja raspoloživa tehnika)

(1) Zaštita komponenti životne sredine postiže se najboljom raspoloživom tehnikom.

(2) Najbolja raspoloživa tehnika je najnapredniji oblik tehnologije koji se može primijeniti u industriji pod uslovima koji zadovoljavaju najviše tehničke i ekološke standarde.

(3) Sadržaj najbolje raspoložive tehnike i druga pitanja koja se odnose na najbolju raspoloživu tehniku utvrđuju se podzakonskim aktom koji donosi Odjeljenje za prostorno planiranje i imovinsko-pravne poslove (u daljnjem tekstu: nadležno odjeljenje).

Član 16. (Integrirana zaštita komponenti životne sredine)

(1) Komponente životne sredine moraju biti zaštićene pojedinačno i u međusobnoj vezi sa ostalim komponentama životne sredine, uzimajući u obzir njihove međuzavisne odnose u skladu s čim se utvrđuje i način opterećivanja i korištenja komponenti životne sredine.

(2) Pojedine oblasti zaštite i očuvanja komponenti životne sredine, uređuju se posebnim zakonima.

Član 17. (Zaštita zemljišta)

(1) Zaštita zemljišta se odnosi na zaštitu površine i ispod površinskog sloja zemljišta, formacija stijena i minerala, kao i njihovih prirodnih i prelaznih oblika i procesa.

- (2) Na površini ili ispod površine zemljišta mogu se obavljati djelatnosti i odlagati materije koje ne zagađuju i ne oštećuju zemljište.
- (3) Prilikom obavljanja djelatnosti kao što je izgradnja i eksploatacija mineralnih sirovina, obezbjeđuje se zaštita zemljišta.
- (4) Nakon prestanka obavljanja djelatnosti koje uključuju korištenje zemljišta, korisnik je dužan vratiti zemljište u stanje u kojem je bilo prije početka obavljanja djelatnosti.
- (5) Zaštita zemljišta, korištenje i upravljanje zemljištem i druga pitanja koja se tiču zaštite zemljišta propisuju se posebnim zakonom.

Član 18. **(Zaštita vazduha)**

- (1) Zaštita vazduha se odnosi na praćenje kvaliteta vazduha, smanjenje zagađivanja vazduha zagađujućim materijama ispod propisanih graničnih vrijednosti i preduzimanje tehničko-tehnoloških i drugih potrebnih mjera za smanjenje emisije, praćenjem uticaja zagađenog vazduha na zdravlje ljudi i životnu sredinu.
- (2) Planiranje i sprovođenje mjera iz stava (1) ovog člana, izvori emisija, zaštita vazduha, nadzor, učešće javnosti i finansiranje zaštite vazduha propisuju se posebnim zakonom.

Član 19. **(Zaštita voda)**

- (1) Zaštita voda se odnosi na očuvanje površinskih i podzemnih voda i njihovih rezervi, kvaliteta i količine, kao i zaštitu korita, obalnih područja i slivova.
- (2) Zaštitom voda obezbjeđuje se sprečavanje ili ograničavanje unošenja u vode opasnih supstanci, praćenje i ispitivanje kvaliteta površinskih i podzemnih voda, kao i kvaliteta otpadnih voda i njihovo prečišćavanje.
- (3) Zaštita voda, planiranje i sprovođenje mjera za zaštitu voda i druga pitanja koja se tiču zaštite voda propisuju se posebnim zakonom.

Član 20. **(Zaštita biljnog i životinjskog svijeta)**

- (1) Zaštita biljnog i životinjskog svijeta obuhvata zaštitu organizama, njihovih zajednica i staništa, uključujući i očuvanje prirodnih procesa i prirodne ravnoteže unutar eko-sistema, uz obezbjeđivanje njihove održivosti.
- (2) Biodiverzitet se štiti na način koji omogućava njegov opstanak, raznovrsnost, obnavljanje i unapređivanje u slučaju narušenosti.
- (3) Zaštita biodiverziteta vrši se na osnovu ovog i posebnog zakona.

Član 21. **(Očuvanje izgrađene životne sredine)**

(1) Prostorno planskom dokumentacijom određuju se zone građenja na određenim lokacijama zavisno od stepena opterećenja životne sredine i svrhe izgradnje unutar pojedinih dijelova na određenim lokacijama.

(2) Obavljanje djelatnosti u pojedinim zonama, sa različitim nivoima zaštite područja, dozvoljeno je na način utvrđen posebnim propisima u skladu sa prirodom opterećivanja životne sredine i ovim zakonom.

Član 22. **(Upravljanje opasnim supstancama i tehnologijama)**

(1) Upravljanje opasnim supstancama, odnosno zaštita od organskih i neorganskih supstanci sa opasnim svojstvima, kao i planiranje, organizovanje i preduzimanje preventivnih i sanacionih mjera vrši se pod uslovima i na način kojim se obezbjeđuje smanjenje rizika po životnu sredinu i zdravlje ljudi.

(2) Fizičko ili pravno lice koje upravlja opasnim supstancama ili koje primjenjuje tehnologije štetne po životnu sredinu, dužno je preduzimati potrebne zaštitne i sigurnosne mjere kojima se rizik od opasnosti po životnu sredinu i zdravlje ljudi svodi na najmanju moguću mjeru, u skladu sa posebnim propisom.

Član 23. **(Zaštita od štetnog uticaja otpada)**

(1) Zaštita od štetnog uticaja otpada po životnu sredinu obuhvata zaštitu od supstanci i proizvoda, uključujući ambalažu i materijal za pakovanje supstanci, odnosno sve vrste proizvoda koji se odlažu.

(2) Imalac otpada je dužan preduzimati mjere za upravljanje otpadom radi sprečavanja ili smanjenja nastajanja otpada, ponovnu upotrebu recikliranog otpada, izdvajanje sekundarnih sirovina i korištenje otpada kao energenta.

(3) Planiranje upravljanja otpadom, izdavanje dozvola za upravljanje otpadom, nadzor nad upravljanjem otpadom, djelatnosti i odgovornosti upravljanja otpadom, prekogranično kretanje otpada i naknada štete propisuje se posebnim zakonom.

Član 24. **(Zaštita od buke i vibracija)**

(1) Zaštitu od buke i vibracija dužno je provoditi pravno ili fizičko lice koje prouzrokuje buku odnosno vibracije, primjenom mjera zaštite kojima se smanjuje, sprječava i otklanja emisija buke, odnosno reguliše rad postrojenja, uređaja, mašina, transportnih sredstava i aparata koji prouzrokuju buku odnosno vibracije.

(2) Na prijedlog nadežnog odjeljenja, Vlada usvaja Pravilnik o buci i vibracijama u okolišu, kojim se uređuje dozvoljeni nivo buke i vibracija, mjere zaštite od buke i vibracija, način mjerenja i evidentiranja buke i vibracija, granične vrijednosti buke i vibracija svrstane prema ambijentu, namjeni prostora i dobu dana i druga pitanja vezana za zaštitu od buke i vibracija.

Član 25. **(Zaštita od zračenja i svjetlosnog zagađenja)**

- (1) Zaštita od zračenja sprovodi se primjenom mjera kojima se sprječava ugrožavanje životne sredine i zdravlja ljudi od dejstava zračenja koja potiču iz jonizujućih i nejonizujućih izvora.
- (2) Proizvodnja i korištenje izvora jonizujućih i nejonizujućih zračenja uređuju se posebnim zakonom.
- (3) Svjetlosno zagađenje je promjena nivoa prirodne svjetlosti prouzrokovana unošenjem svjetlosti proizvedene ljudskim djelovanjem.
- (4) Zaštita od svjetlosnog zagađenja obuhvata mjere zaštite od nepotrebnih, nekorisnih ili štetnih emisija svjetlosti u prostor u zoni i izvan zone koju je potrebno osvijetliti, te mjere zaštite noćnog neba od prekomjernog osvjetljenja za koje je odgovorno pravno ili fizičko lice koje proizvodi svjetlosno zagađenje.
- (5) Na prijedlog nadležnog odjeljenja, Vlada usvaja pravilnik kojim se uređuju mjere zaštite od svjetlosnog zagađenja.

POGLAVLJE III - INFORMISANJE I EDUKACIJA U OBLASTI ZAŠTITE ŽIVOTNE SREDINE

Član 26.

(Sistem informisanja o životnoj sredini i prikupljanje informacija)

- (1) Nadležno odjeljenje uspostavlja sistem informisanja o životnoj sredini i nalaže monitoring životne sredine, djelatnosti mjerenja, prikupljanja, obrade i evidentiranja podataka o korištenju i opterećenju životne sredine.
- (2) Neovisno o uspostavljanju sistema informisanja o životnoj sredini, nadležno odjeljenje je dužno da redovno, blagovremeno i objektivno obavještava javnost o stanju životne sredine, odnosno o pojavama koje se prate u okviru monitoringa emisije i imisije, kao i mjerama upozorenja ili razvoju zagađenja koja mogu predstavljati opasnost po život i zdravlje ljudi.
- (3) Svako lice koje ima saznanja o uticajima na životnu sredinu od interesa za javnost dužno je o tome izvijestiti bez odlaganja nadležno odjeljenje i nadležnu inspekciju.
- (4) Javnost ima pravo pristupa registrima i evidencijama koje sadrže informacije i podatke u skladu sa ovim zakonom.
- (5) Sistem informisanja o životnoj sredini sadrži podatke o:
 - a) stanju komponenti životne sredine;
 - b) opterećivanju životne sredine;
 - c) potencijalnim opasnostima;
 - d) mjerama ili aktivnostima utvđenim radi zaštite životne sredine i njenih komponenti uključujući i administrativne mjere, kao što su strateški dokumenti, propisi, planovi, programi, sporazumi;
 - e) propisima i uslovima zaštite životne sredine; i
 - f) drugim podacima od važnosti za opšte informisanje javnosti o stanju u sektoru životne sredine.

(6) Način uspostavljanja sistema informisanja o životnoj sredini i prikupljanja informacija uređuje se Pravilnikom koji donosi Vlada Brčko distrikta Bosne i Hercegovine (u daljem tekstu: Vlada), na prijedlog nadležnog odjeljenja.

Član 27.

(Mjerenje opterećenja životne sredine i korištenja životne sredine)

(1) Korisnik životne sredine dužan je vršiti mjerenja opterećenja životne sredine i korištenja životne sredine koja su posljedica obavljanja djelatnosti.

(2) Korisnik životne sredine dužan je inspektoru za zaštitu životne sredine (u daljnjem tekstu: nadležni inspektor) omogućiti pristup podacima dobijenim mjerenjem iz stava (1) ovog člana.

(3) Nadležni inspektor može obavezati korisnika životne sredine na ponavljanje, odnosno obavljanje dodatnih mjerenja opterećenja životne sredine i korištenja životne sredine.

(4) Način vršenja mjerenja opterećenja životne sredine i korištenja životne sredine uređuje se Pravilnikom koji donosi Vlada, na prijedlog nadležnog odjeljenja.

Član 28.

(Saradnja i edukacija u oblasti zaštite životne sredine)

(1) U cilju zaštite i unapređenja znanja o životnoj sredini nadležno odjeljenje saraduje sa drugim odjeljenjima i institucijama Distrikta, kao i udruženjima za zaštitu životne sredine.

(2) Nadležno odjeljenje poduzima mjere i pruža podršku na edukaciji javnosti u okviru svojih mogućnosti.

Član 29.

(Koordinacija aktivnosti na zaštiti životne sredine)

(1) Nadležno odjeljenje je dužno koordinirati sa nadležnim tijelima Bosne i Hercegovine i Entiteta radi osiguranja da su interesi Distrikta, Bosne i Hercegovine i Entiteta uzeti u obzir pri planiranju i realizaciji projekata koji mogu imati međusobni utjecaj na životnu sredinu kako unutar Bosne i Hercegovine, između Entiteta i Distrikta, tako i u prekograničnom kontekstu.

(2) Radi realizacije obaveza utvrđenih u stavu (1) nadležno odjeljenje učestvuje u tijelima formiranim na bilo kojem nivou vlasti u Bosni i Hercegovini.

(3) Za potrebe koordinacije aktivnosti saglasno odredbama ovog člana, Vlada imenuje dva predstavnika u takvim tijelima, na prijedlog šefa nadležnog odjeljenja.

POGLAVLJE IV- UČEŠĆE JAVNOSTI I PRISTUP INFORMACIJAMA KOJE SE ODOSE NA PITANJA ŽIVOTNE SREDINE

Član 30.

(Registar zagađivača, zagađenja i pogona i postrojenja u kojima su prisutne opasne supstance)

(1) Nadležno odjeljenje vodi elektronski registar o zagađivačima, zagađenjima i pogonima i postrojenjima u kojima su prisutne opasne supstance o kojima se mora izvještavati u skladu sa zakonskim obavezama i međunarodnim ugovorima.

(2) Elektronski registar sadrži podatke o pogonima i postrojenjima koji ugrožavaju ili mogu ugroziti životnu sredinu, a naročito:

- a) naziv i adresu zagađivača i lokaciju pogona i postrojenja;
- b) vrstu djelatnosti, sažet opis djelatnosti i tehnološkog procesa;
- c) podatke o godišnjoj količini ispuštene zagađujuće supstance u okoliš, količini opasnih supstanci prisutnih u pogonu i postrojenju ili proslijeđenih za dalji tretman van lokacije pogona i postrojenja ili u drugu državu, količinama komunalnog otpada i upotrebi resursa i energije, a naročito vode, električne energije, druge energije i drugih resursa;
- d) podatke koji se odnose na izdata odobrenja i dozvole zagađivaču, pogonu ili postrojenju kao i promjene u radu; i
- e) podatke o inspeksijskom nadzoru, aktivnostima i poduzetim mjerama.

(3) Zagađivač je dužan podatke neophodne za elektronski registar ili dostaviti nadležnom odjeljenju ili sam učiniti dostupnim podatke o zagađenju unosom istih u elektronski registar.

(4) Na prijedlog nadležnog odjeljenja, Vlada Pravilnikom utvrđuje vrstu podataka, način i rokove za njihovo dostavljanje i izvještavanje.

(5) Elektronski registar o zagađivačima, zagađenjima i pogonima i postrojenjima u kojima su prisutne opasne supstance dostupni su javnosti putem Internet stranice Vlade.

(6) Svakom zainteresovanom licu je omogućen pristup i uvid u elektronski registar i traženje podataka iz elektronskog registra.

(7) Nadležno odjeljenje i nadležni inspektor imaju direktan i aktivan pristup elektronskom registru.

Član 31.

(Pružanje informacija o zaštiti životne sredine)

(1) Nadležno odjeljenje pruža informacije o stanju životne sredine na transparentan način.

(2) Nadležno odjeljenje koristi štampane ili elektronske medije za dostavljanje informacija široj javnosti.

(3) U slučaju neposredne opasnosti po ljudsko zdravlje ili životnu sredinu, nadležno odjeljenje dostavlja hitno predstavnicima javnosti sve informacije koje posjeduje i koje bi javnosti mogle omogućiti poduzimanje mjera za sprječavanje ili ublažavanje štete koja proizlazi iz određene opasnosti.

Član 32.

(Informacije o životnoj sredini i javnost)

(1) Informacije o životnoj sredini uključuju sve informacije u pisanom, vizuelnom, usmenom, audio, elektronskom i drugom obliku o:

- a) stanju komponenti životne sredine, pejzažu i prirodnoj lokaciji, biološkom diverzitetu i njegovim komponentama, uključujući genetski modificovane organizme i interakciju između tih komponenti;
- b) supstancama, energiji, buci, radijaciji, te aktivnostima i mjerama, uključujući administrativne mjere, okolinske sporazume, politike, zakonodavstvo, planove i programe, koji se odnose na komponente životne sredine u okviru tačke a) ovog člana, isplativosti i drugih ekonomskih analiza i pretpostavki koje se koriste u odlučivanju po pitanju životne sredine; i
- c) stanju ljudskog zdravlja i sigurnosti, uslovima ljudskog življenja, kulturnim lokacijama i graditeljskim strukturama, onoliko koliko su one pod utjecajem ili mogu biti pod utjecajem stanja komponenti životne sredine, te putem tih komponenti pod uticajem faktora, aktivnosti i mjera iz tačke b) ovog člana.

Član 33. (Zabrana diskriminacije)

(1) U skladu sa odredbama ovog zakona javnost ima pristup informacijama, mogućnost učešća u odlučivanju i zaštiti prava pred upravnim i sudskim organima po pitanjima zaštite životne sredine, bez diskriminacije na osnovu državljanstva, nacionalnosti ili mjesta stanovanja i u slučaju pravnih lica bez diskriminacije na osnovu mjesta sjedišta odnosno mjesta registracije kao poslovnog subjekta.

(2) Zloupotreba prava na pokretanje parnice, zahtjeva za plaćanje odštete ili pokretanja krivičnog, prekršajnog ili radno-pravnog postupka radi kažnjavanja, progona ili uznemiravanja lica koja su ostvarivala svoja prava na učešće javnosti u aktivnostima vezanim za zaštitu životne sredine, smatrat će se nezakonitim.

Član 34. (Pristup informacijama o životnoj sredini)

(1) Na zahtjev za pristup informacijama u vezi životne sredine, nadležno odjeljenje i drugi organi uprave i pravna lica koja vrše javna ovlaštenja, a posjeduju informaciju o životnoj sredini, dužni su osigurati da takve informacije budu dostupne javnosti.

(2) Nadležno odjeljenje daje informacije u pismenom obliku.

(3) Informacija iz stava (1) ovog člana može biti data i u drugom obliku uz navođenje razloga za takvim oblikom ili u slučaju njene dostupnosti u drugom obliku.

(4) Informacije o životnoj sredini iz stava (1) ovog člana se stavljaju na raspolaganje što je prije moguće, a najkasnije u roku od 10 dana od dana podnošenja zahtjeva osim u slučajevima kada sadržaj i složenost datih informacija opravdava produženje ovog roka do maksimalno 30 dana.

(5) Ukoliko nadležno odjeljenje ne raspolaže traženim informacijama, odgovorit će na zahtjev u roku od najviše 3 dana ili u istom roku proslijediti zahtjev odjeljenju ili organu uprave za kojeg smatra da bi moglo raspolagati traženim informacijama.

(6) Podnosilac zahtjeva biće obavješten o svakom produženju datog roka i razlozima takvog produženja.

Član 35.
(Odbijanje davanja informacija o životnoj sredini)

(1) Zahtjev za davanje informacije o životnoj sredini se odbija ukoliko:

- a) je zahtjev nerazumljiv ili formulisan uopšteno i iz istog se ne da zaključiti koja se konkretno informacija traži; ili
- b) zahtjev se tiče informacije koja je u fazi pripreme ili unutrašnje komunikacije organa uprave odnosno u slučaju da je izuzimanje o davanja informacije predviđeno nekim drugim zakonom, uzimajući u obzir ugrožavanje opšteg interesa davanjem informacije.

(2) Zahtjev za informacije o životnoj sredini može biti odbijen ukoliko bi davanje informacija imalo štetan uticaj na:

- a) međunarodne odnose, odbranu ili opštu sigurnosti;
- b) tok pravnog postupka, pravo lica na pravično suđenje i mogućnosti suda ili organa uprave u provođenju krivičnog odnosno disciplinskog postupka;
- c) povjerljivost informacija koje se odnose na trgovinu ili industriju, ukoliko je povjerljivost informacije utvrđena posebnim propisom u cilju zaštite ekonomskih interesa, izuzev informacija o emisijama koje su relevantne za zaštitu životne sredine;
- d) prava intelektualnog vlasništva;
- e) povjerljivost ličnih podataka i/ili isprave koji se odnose na fizička lica u slučaju da ta lica nisu dala suglasnost za otkrivanje datih informacija javnosti, ukoliko je to predviđeno posebnim propisom;
- f) interese trećeg lica koje je osiguralo tražene informacije, a da to nije bilo obavezno i ukoliko to lice nije dalo suglasnost za otkrivanje datog materijala; i
- g) životnu sredinu na koju se informacije odnose, kao na primjer mjesto uzgoja rijetkih vrsta i tome slično.

(4) Nadležno odjeljenje u formi rješenja odbija zahtjev za pristup informacijama.

Član 36.
(Učešće javnosti u postupku donošenja odluka)

(1) Nadležno odjeljenje osigurava učešće javnosti u odlučivanju kod vođenja svih postupaka koji se tiču donošenja odluka o životnoj sredini provođenjem javne rasprave ili omogućavajući javni uvid, za:

- a) projekte za koje se zahtijeva izrada Studije uticaja na životnu sredinu, u obliku javne rasprave;
- b) sve postojeće pogone i postrojenja i nove pogone i postrojenja za koje se ne zahtijeva izrada Studije uticaja na životnu sredinu, u obliku javnog uvida;
- c) djelatnosti opasne po životnu sredinu ili kada se djelatnost namjerava obavljati na osjetljivoj lokaciji; i
- d) prestanak rada, zatvaranje ili rušenje pogona i postrojenja, u obliku javne rasprave.

(2) Odredbe ovog člana ne primjenjuju se u slučaju donošenja odluka o djelatnostima koje služe za odbranu i/ili sigurnost.

(3) Nakon pokretanja upravnog postupka, nadležno odjeljenje obavještava javnost o:

- a) zahtjevu za procjenu uticaja na životnu sredinu, zahtjevu za izdavanje ekološke dozvole i predloženim djelatnostima i tehnologijama podnosioca zahtjeva;
- b) načinu učešća javnosti (javna rasprava ili javni uvid);
- c) mjestu na kojem se može izvršiti uvid u dokumentaciju odnosno mjestu održavanja javne rasprave;
- d) informacijama o životnoj sredini koje su relevantne za predložene aktivnosti; i
- e) roku za podnošenje primjedbi, prijedloga, mišljenja i pitanja.

(4) Javnost se obavještava putem sredstava javnog informisanja ili Internet stranice Vlade u pismenoj formi o vremenu održavanja javne rasprave, postupku izvođenja dokaza, te mogućnosti dostavljanja dokaza i informacija od uticaja na rješavanje u konkretnom postupku.

(5) Rok za podnošenje primjedbi, informacija, analiza ili mišljenja potencijalno relevantnih u konkretnom postupku ne može biti kraći od 30 dana.

(6) Primjedbe, informacije, analize ili mišljenja prikupljene u toku postupka iz ovog člana uzimaju se u obzir prilikom donošenja odluke, o čemu se javnost informiše putem Internet stranice Vlade, a zainteresovane strane koje su dostavile svoje komentare u bilo kojem obliku u toku postupka se obavještavaju pismeno u rokovima propisanim za odgovaranje na zahtjev za pristup informacijama.

Član 37. **(Javni uvid u informacije)**

(1) Nadležno odjeljenje omogućava javni uvid u informacije koje se odnose na:

- a) opis lokacije, fizičkih i tehničkih karakteristika predložene djelatnosti uključujući procjenu očekivanih emisija;
- b) opis znatnih uticaja predložene djelatnosti po životnu sredinu;
- c) opis mjera predviđenih za sprječavanje i/ili smanjenje uticaja uključujući emisije;
- d) netehnički rezime;
- e) prikaz osnovnih alternativnih rješenja; i
- f) izvještaj i stručna mišljenja.

(2) Nadležno odjeljenje dužno je postupati sa zaštićenim i povjerljivim informacijama saglasno odredbama ovog zakona te posebnim propisima koji uređuju pitanje zaštite ličnih podataka.

Član 38. **(Pravo žalbe)**

(1) Zainteresovana strana može žalbom Apelacionoj komisiji, pobijati odluku nadležnog odjeljenja.

(2) Zainteresovana strana ima pravo podnijeti žalbu Apelacionoj komisiji i protiv odluke o zahtjevu za pristup informacijama u slučaju da zahtjev nije razmatran ili je na isti odgovoreno nepotpuno ili djelimično.

POGLAVLJE V - PLANIRANJE I ZAŠTITA ŽIVOTNE SREDINE

Član 39. (Strategija zaštite životne sredine)

- (1) Strategija zaštite životne sredine (u daljem tekstu: strategija) je planski dokument kojim se utvrđuju ciljevi i prioriteta zaštite životne sredine, način njihovog ostvarivanja, finansijski i institucionalni okvir za implementaciju, monitoring, evaluaciju i izvještavanje.
- (2) Strategija se donosi za period od deset godina.
- (3) Prijedlog strategije se dostavlja institucijama na nivou Bosne i Hercegovine i nadležnim ministarstvima entiteta, radi davanja mišljenja.
- (4) Mišljenja, primjedbe i sugestije na prijedlog strategije dostavljaju se u roku od 30 dana od dana prijema prijedloga.
- (5) Šef nadležnog odjeljenja dostavlja nacrt strategije Vladi na odobravanje.
- (6) Strategiju usvaja Skupština Brčko distrikta Bosne i Hercegovine (u daljem tekstu: Skupština), na prijedlog Vlade.

Član 40. (Sadržaj strategije)

Strategija sadrži sljedeće podatke:

- a) ocjenu stanja komponenti životne sredine;
- b) načela i mjere za određivanje ciljeva i prioriteta;
- c) vrste i izvore negativnog uticaja na životnu sredinu;
- d) ciljeve i smjernice za upravljanje životnom sredinom;
- e) mjere za sprovođenje zaštite životne sredine;
- f) pregled prostornih cjelina na kojima je potrebno sprovesti sanaciju ugrožene životne sredine;
- g) smjernice za upravljanje rizicima i sprečavanje nesreća većih razmjera;
- h) najpovoljnije tehničke, proizvodne i privredne mjere upravljanja životnom sredinom;
- i) kratkoročne i dugoročne mjere za sprečavanje i ograničavanje zagađenja životne sredine i redoslijed njihovog sprovođenja s rokom izvršavanja;
- j) obavezu monitoringa životne sredine u skladu sa zaključenim međunarodnim sporazumima;
- k) izvore i procjenu potrebnih sredstava za sprovođenje mjera zaštite životne sredine;
- l) analizu troškova i koristi za sprovođenje mjera zaštite životne sredine;
- m) odnos ravnomjernog privrednog razvoja i efikasne zaštite životne sredine;
- n) osnove unapređivanja obrazovanja na području zaštite životne sredine;
- o) osnovu usmjeravanja naučnoistraživačkog rada na području zaštite životne sredine;
- p) način provjere ostvarivanja ciljeva, smjernica i mjera zaštite životne sredine; i
- r) druge potrebne podatke.

Član 41. (Akcioni plan)

- (1) Akcioni plan je planski dokument za realizaciju strategije.

(2) Akcioni plan sadrži:

- a) mjere i aktivnosti;
- b) način sprovođenja mjera;
- c) redoslijed ostvarivanja mjera;
- d) rok izvršavanja;
- e) nosioce sprovođenja; i
- f) projekte i procjenu sredstava za sprovođenje plana sa naznačenim izvorima finansiranja.

(3) Akcioni plan donosi Vlada u roku od godine dana od dana usvajanja strategije, na prijedlog nadležnog odjeljenja.

(4) Akcioni plan se revidira po potrebi, a najmanje jednom u pet godina.

Član 42.

(Izvještaj o stanju životne sredine)

(1) Izvještaj o stanju životne sredine je dokument koji sadrži podatke o realizaciji strategije i akcionog plana te stanju životne sredine u Distiktu, a naročito:

- a) podatke o stanju po svakoj od komponenti životne sredine;
- b) podatke o uticaju pojedinih djelatnosti na životnu sredinu;
- c) podatke o negativnim uticajima na životnu sredinu;
- d) ocjenu sprovedenih mjera i njihovu efikasnost;
- e) pregled ostvarivanja ciljeva strategije;
- f) ocjenu korištenja finansijskih sredstava za zaštitu životne sredine; i
- g) druge važne podatke za zaštitu životne sredine.

(2) Izvještaj iz stava (1) ovog člana izrađuje Komisija za praćenje realizacije strategije i akcionog plana (u daljem tekstu: Komisija), svake tri godine u periodu važenja strategije i akcionog plana.

(3) Komisija iz stava (2) ovog člana ima pet članova i čine je predstavnici nadležnog odjeljenja, Inspektorata, Odjeljenja za poljoprivredu, šumarstvo i vodoprivredu, Odjeljenja za zdravstvo i ostale usluge i Odjeljenja za komunalne poslove.

(4) Komisiju iz stava (2) ovog člana imenuje gradonačelnik Brčko distrikta Bosne i Hercegovine (u daljnjem tekstu: gradonačelnik), na prijedlog šefova odjeljenja iz stava (3) ovog člana i Inspektorata.

(5) Izvještaj iz stava (1) ovog člana, Komisija dostavlja Vladi na razmatranje i usvajanje.

POGLAVLJE VI - STRATEŠKA PROCJENA UTICAJA NA ŽIVOTNU SREDINU

Član 43.

(Strateška procjena uticaja na životnu sredinu)

(1) Strateška procjena uticaja na životnu sredinu (u daljem tekstu: strateška procjena) je postupak kojim se prethodno procjenjuju mogući znatni uticaji na životnu sredinu koji bi mogli nastati provođenjem strategije i akcionog plana.

(2) Strateškom procjenom se omogućava da se odluke o prihvatanju strategije i akcionog plana donose na temelju poznavanja mogućih znatnih uticaja koje se tiču realizacije strategije i akcionog plana donose na temelju poznavanja mogućih uticaja mjera i aktivnosti u realizaciji strategije i akcionog plana koje bi strategija i akcioni plan svojom provedbom mogli imati na životnu sredinu, a nosiocima aktivnosti i mjera se daje okvir djelovanja i omogućava uključivanje bitnih elemenata zaštite životne sredine u donošenje odluka.

(3) Strateška procjena, kojom se uspostavlja okvir za odobravanje razvojnih projekata, se obavezno provodi prilikom pripreme strategija, planova i akcionih planova u slijedećim oblastima:

- a) prostornog planiranja i upotrebe zemljišta;
- b) poljoprivrede;
- c) šumarstva;
- d) ribarstva;
- e) lovstva;
- f) energetike;
- g) industrije;
- h) prometa;
- i) upravljanja otpadom;
- j) upravljanja vodama;
- k) telekomunikacijama;
- l) turizma; i
- m) očuvanja prirodnih staništa biljnog i životinjskog svijeta.

(4) Strateška procjena se izrađuje na temelju strategija razvoja određenog sektora, odnosno karakteristika pojedinačnog sektora, ciljeva njegovog razvoja i prostornog obuhvata.

Član 44.

(Strategije i planovi koji ne podliježu strateškoj procjeni)

Strateškoj procjeni ne podliježu strategije i drugi planski dokumenti koji služe isključivo za potrebe civilne zaštite, proglašenja elementarne nepogode, zaštite i spašavanja, planova upravljanja rizikom od poplava te finansijske i budžetske strategije.

Član 45.

(Faze u postupku strateške procjene)

(1) Strateška procjena provodi se u slijedećim fazama:

- a) faza utvrđivanja obima i sadržaja strateške studije;
- b) faza ocjene strateške studije od strane stručne komisije (u daljem tekstu: Komisija za stratešku procjenu);
- c) faza konsultacija na nacrt strategije i akcionog plana i stratešku studiju koja obuhvata:

- 1) učešće zainteresovanih strana i organizacija;
- 2) učešće javnosti;

3) konsultacije za zainteresovanim odjeljenjima, organizacijama i javnosti Distrikta, entiteta ili druge zemlje, ukoliko izvršenje strategije i akcionog plana može imati utjecaj i izvan Distrikta; i

4) izvještaj o rezultatima sudjelovanja zainteresovanih odjeljenja, organizacija i javnosti.

d) faza ocjene nacрта strateške studije;

e) usvajanje izvještaja nadležnog odjeljenja odgovornog za pripremu strategije i akcionog plana.

(2) Konsultacije sa predstavnicima druge države kao i procedura pribavljanja i davanja mišljenja u vezi sa strateškom procjenom, vode se putem institucija Bosne i Hercegovine nadležnih za vanjsku politiku i zaštitu životne sredine.

Član 46.

(Nadležnost za provođenje strateške procjene)

Odjeljenje nadležno za pripremu strategije i drugih planskih dokumenata dužno je prije započinjanja postupka pribaviti mišljenje nadležnog odjeljenja o potrebi za izradom strateške procjene i obimu i sadržaju strateške procjene.

Član 47.

(Utvrđivanje obima, sadržaja i ocjene strateške studije)

Potreba izrade strateške studije, utvrđivanje obima, sadržaja i ocjene strateške studije detaljno se utvrđuje Pravilnikom koji, na prijedlog nadležnog odjeljenja, usvaja Vlada.

Član 48.

(Način provođenja strateške procjene)

(1) Strateška procjena se provodi tokom izrade nacрта strategije i akcionog plana, prije utvrđivanja konačnog prijedloga strategije i akcionog plana i upućivanja na usvajanje.

(2) U postupku strateške procjene osigurava se informisanje i sudjelovanje javnosti na način propisan ovim zakonom.

(3) Izuzetno od stavova (1) i (2) ovog člana, postupak provedbe strateške procjene, te postupak informisanja i sudjelovanja javnosti koji se provodi tokom izrade dokumenata prostornog uređenja, provodi se u ranoj fazi izrade tog dokumenta saglasno posebnom propisu.

Član 49.

(Izrada strateške studije)

(1) U postupku strateške procjene izrađuje se strateška studija.

(2) Strateškom studijom određuju se, opisuju i procjenjuju očekivani značajni uticaji na životnu sredinu koje može uzrokovati provođenje strategije i akcionog plana i mogućnosti vezanih za zaštitu životne sredine koje uzimaju u obzir ciljeve i obuhvat strategije i akcionog plana.

(3) Strateška studija je stručna podloga koja se prilaže uz strategiju i akcioni plan i čini njen sastavni dio.

Član 50.
(Organ nadležan za izbor nosioca izrade strateške studije)

(1) Odjeljenje nadležno za pripremu strategije i akcionog plana izrađuje stratešku studiju ili odlučuje o izboru nosioca izrade strateške studije, po postupku utvrđenom Zakonom o javnim nabavkama.

(2) Nosilac izrade strateške studije može biti pravno lice sa sjedištem u Bosni i Hercegovini.

(3) Pravna lica koja su sudjelovala u izradi strategije ili akcionog plana ne mogu biti angažovane na izradi strateške studije.

Član 51.
(Komisija za ocjenu strateške studije)

(1) Ocjenu strateške studije vrši Komisija za ocjenu strateške studije koju imenuje Vlada Distrikta, na prijedlog nadležnog odjeljenja.

(2) Komisija za ocjenu strateške studije dužna je dostaviti zainteresovanim odjeljenjima i organizacijama na mišljenje strategiju, akcioni plan i stratešku studiju.

(3) Zainteresirani organi dužni su dostaviti mišljenje u roku od 30 dana od dana prijema strateške studije, a ako u ostavljenom roku ne dostave mišljenje, smatraće se da nema primjedbi na istu.

Član 52.
(Učešće javnosti u postupku strateške procjene)

Na učešće javnosti u postupku strateške procjene analogno se primjenjuju odredbe člana 36. ili člana 37. ovog Zakona.

Član 53.
(Ocjena strateške studije)

(1) Postupak strateške procjene završava ocjenom strateške studije od strane Komisije za ocjenu strateške studije.

(2) Ocjena strateške studije sadrži načine na koje pitanja zaštite životne sredine treba da budu integrisana u strategiju i akcioni plan.

Član 54.
(Mišljenje nadležnog odjeljenja)

Nadležno odjeljenje u roku od 30 dana od dostavljene ocjene Komisije za ocjenu strateške studije daje mišljenje, uzimajući u obzir interese zaštite, očuvanja i unapređenja životne sredine, a naročito:

- a) stepen uticaja provođenja strategije i akcionog plana na životnu sredinu, cijeneći svaki pojedinačni uticaj, kao i kumulativni uticaj na području koje je obuhvaćeno strategijom i akcionim planom;
- b) mjere i aktivnosti koje se trebaju preduzeti da bi se negativan uticaj realizacije strategije i akcionog plana umanjio ili izbjegao kao i moguće alternative zasnovane na ciljevima i geografskom domašaju strategije i akcionog plana;
- c) izvještaj o provedenim konsultacijama sa nadležnim odjeljenjima, organizacijama i javnosti; i
- d) način na koji se predviđa praćenje uticaja na životnu sredinu realizacije strategije i akcionog plana kao i mjere koje će se preduzeti ako pri njihovoj realizaciji bude uočen veći negativan uticaj na životnu sredinu nego što je to predviđeno ili očekivano.

Član 55.
(Sredstva za stratešku procjenu)

Sredstva za stratešku procjenu, kada se takav postupak provodi, osiguravaju se iz sredstava budžeta Distrikta.

POGLAVLJE VII – PROCJENA UTICAJA NA ŽIVOTNU SREDINU

Član 56.
(Procjena uticaja na životnu sredinu)

(1) Procjena uticaja na životnu sredinu (u daljem tekstu: procjena uticaja) obuhvata identifikaciju, opis, procjenu, direktan ili indirektan uticaj projekta na:

- a) ljude, biljni i životinjski svijet i svijet gljiva;
- b) tlo, vodu, zrak, klimu i pejzaž;
- c) materijalna dobra i kulturnu baštinu; i
- d) međudjelovanje faktora navedenih pod tačkama a), b) i c).

(2) Procjeni uticaja ne podliježu projekti koji služe isključivo za svrhe odbrane ili projekti čija je jedina stvrha odgovor na civilna izvanredna stanja.

Član 57.
(Nadležnost za procjenu uticaja na životnu sredinu)

(1) Nadležno odjeljenje provodi postupak procjene uticaja.

(2) U postupak procjene uticaja uključuju se zainteresovane strane, nadležna odjeljenja, udruženja građana i zainteresovana javnost.

Član 58.
(Predmet procjene uticaja na životnu sredinu)

Za projekte koji mogu imati značajan uticaj na životnu sredinu s obzirom na njihovu prirodu, veličinu ili lokaciju, provodi se procjena uticaja.

Član 59.
(Projekti za koje je obavezna procjena uticaja)

(1) Vlada, na prijedlog nadležnog odjeljenja donosi Pravilnik kojim se utvrđuju:

- a) projekti za koje se obavezno provodi procjena uticaja; i
- b) projekti za koje o obavezi procjene uticaja kao i o obimu procjene odlučuje nadležno odjeljenje, na osnovu karakteristika pojedinačnog projekta kao i kriterija, utvrđenih ovim pravilnikom.

(2) Pored projekata utvrđenih u stavu (1) ovog člana, procjena uticaja potrebna je i za:

- a) značajne promjene na projektima, pri čemu promjena projekta dostiže propisane granice utvrđene pravilnikom iz stava (1) ovog člana;
- b) projekte čiji rast, upotreba energije, promjena sirovine, upotreba vode, korištenje prostora, emisije ili proizvodnja prelazi 25% od prvobitno utvrđenih vrijednosti;
- c) prestanak rada, rušenje i zatvaranje objekata iz stava (1) ovog člana i prestanak rada pogona i postrojenja koji podliježu obavezi procjene uticaj; i
- d) istraživačke aktivnosti iz člana 74. stav (3).

Član 60. (Faze procjene uticaja)

Postupak procjene uticaja provodi se u dvije faze:

- a) postupak prethodne procjene uticaja, u kojem se odlučuje o:
 - 1) potrebi provođenja procjene uticaja;
 - 2) obimu procjene uticaja, ako je provođenje procjene uticaja obavezno; i
- b) odobravanje studije o procjeni uticaja.

Član 61. (Pokretanje postupka za prethodnu procjenu uticaja)

(1) Postupak za prethodnu procjenu uticaja pokreće se zahtjevom koji podnosilac podnosi nadležnom odjeljenju.

(2) Zahtjev za prethodnu procjenu uticaja sadrži:

- a) opis projekta, uključujući podatke o njegovoj namjeni i veličini;
- b) izvod iz prostorno-planskog akta;
- c) podatke o vrsti i količini materijala koji će biti korišteni, te vrsti i količini očekivanih emisija;
- d) opis mogućih uticaja projekta na životnu sredinu u toku izradnje, u toku rada ili eksploatacije i u fazi prestanka rada i mjere za smanjenje navedenih uticaja;
- e) opis osnovnih i pomoćnih sirovina i ostalih izvora energije;
- f) opis životne sredine na području pod uticajem projekta; i
- g) netehnički rezime informacija iz stava (2) ovog člana.

(3) Opisi iz stava (2) ovog člana daju se stručnim tehničkim jezikom, sa tekstualnim, numeričkim i grafičkim podacima, a netehnički rezime netehničkim jezikom, na način koji je pogodan za informisanje nadležnih odjeljenja, organizacija i zainteresovane javnosti.

(4) Izradu zahtjeva za prethodnu procjenu uticaja, podnosilac zahtjeva može pripremiti sam ili povjeriti pravnom licu koja je ovlaštena za obavljanje poslova iz oblasti zaštite životne sredine.

(5) Nadležno odjeljenje može zahtijevati od podnosioca zahtjeva dodatne informacije o projektu koje su mu potrebne za donošenje odluke o obavezi provođenja i obima procjene uticaja.

Član 62.

(Obavezni uvid u zahtjev za prethodnu procjenu uticaja)

(1) U postupku razmatranja i odlučivanja o zahtjevu za prethodnu procjenu uticaja, nadležno odjeljenje je obavezno da dostavi kopiju zahtjeva i osigura besplatan uvid u priložena dokumenta radi pribavljanja mišljenja slijedećim subjektima:

a) odjeljenjima nadležnim za zaštitu pojedinačnih komponenti životne sredine koji izvođenjem projekta mogu biti izloženi njegovom značajnom uticaju:

- 1) organima nadležnim za zaštitu kulturno-istorijske i prirodne baštine;
- 2) organima nadležnim za zaštitu zdravlja; i
- 3) drugim zainteresovanim stranama.

b) organu nadležnom za zaštitu životne sredine Bosne i Hercegovine i entiteta, ako se radi o projektu čija realizacija može imati značajan uticaj na životnu sredinu entiteta ili druge države, saglasno ovom Zakonu;

c) zainteresovanoj javnosti.

(2) Pravna i fizička lica iz stava (1) ovog člana daju mišljenje, primjedbe i sugestije nadležnom odjeljenju u vezi sa zahtjevom i priloženoj dokumentaciji, u roku od 15 dana od dana prijema kopije zahtjeva u pismenoj formi.

(3) Nadležno odjeljenje će prilikom donošenja odluke uzeti u obzir dostavljena mišljenja, prijedbe i sugestije iz stava (2) ovog člana.

Član 63.

(Rješenje o prethodnoj procjeni uticaja)

(1) O zahtjevu za prethodnu procjenu uticaja, nadležno odjeljenje odlučuje rješenjem.

(2) Na osnovu prethodne procjene uticaja, rješenjem iz stava (1) utvrđuje se da:

- a) nije potrebna procjena uticaja; ili
- b) je neophodna izrada Studije, obim i sadržaj Studije kod projekata koji u toku izgradnje odnosno izgradnjom mogu imati značajan uticaj.

(3) U rješenju o prethodnoj procjeni uticaja, nadležno odjeljenje će naznačiti potrebu pribavljanja ekološke dozvole.

Član 64.

(Provođenje postupka prethodne procjene uticaja)

(1) Obim Studije određuje se prema specifičnim karakteristikama pojedinačnog projekta i kriterijima određenim u pravilniku iz člana 59. stav (1) ovog Zakona.

(2) Prilikom donošenja rješenja o prethodnoj procjeni uticaja, nadležno odjeljenje dužno je da razmotri i uzme u obzir blagovremeno dostavljena mišljenja i sugestije iz člana 62. ovog Zakona.

(3) Rješenje iz stava (2) ovog člana donosi se u roku od 30 dana od dana prijema zahtjeva.

(4) Nadležno odjeljenje dostavlja rješenje o prethodnoj procjeni uticaja iz stava (2) ovog člana podnosiocu zahtjeva i isto objavljuje na Internet stranici Vlade.

Član 65. (Izrada Studije)

(1) Nakon prijema rješenja o prethodnoj procjeni uticaja, podnosilac zahtjeva je obavezan ugovoriti izradu Studije kod ovlaštenog nosioca izrade Studije.

(2) Vlada, na prijedlog nadležnog odjeljenja, pravilnikom iz člana 59. stav (1) utvrđuje:

- a) uslove za davanje ovlaštenja nosiocima izrade Studije;
- b) način i kriterije koje mora ispunjavati nosilac izrade Studije; i
- c) visinu naknade troškova izdavanja ovlaštenja nosiocima izrade Studije.

(3) Ovlaštenja za izradu Studije izdata od strane nadležnih organa entiteta priznaju se u Distriktu.

(4) Nadležno odjeljenje vodi javni elektronski registar nosilaca izrade Studije kojima je izdato ovlaštenje iz stava (2) ovog člana.

(5) Odjeljenja i drugi organi odnosno organizacije koja imaju nadležnost i/ili odgovornost u oblasti zaštite životne sredine dužna su omogućiti pristup podacima koji su potrebni za izradu Studije.

Član 66. (Sadržaj Studije)

(1) Posebnim Pravilnikom koji donosi Vlada na prijedlog nadležnog Odjeljenja utvrđuje se sadržaj Studije.

(2) Pored sadržaja utvrđenih u pravilniku iz stava (1) ovog člana, Studija sadrži i dio u kojem se daje skraćeni pregled dostavljenih mišljenja, primjedaba i sugestija zainteresovanih strana u postupku prethodne procjene uticaja i obazloženja mišljenja, primjedaba i sugestija koja su uzeta u obzir prilikom izrade Studije.

(3) Ukoliko se radi o projektu za koji je potrebno pribavljanje Ekološke dozvole saglasno ovom zakonu i podzakonskim aktima, Studija sadrži i Plan upravljanja otpadom koji se izrađuje u skladu sa posebnim zakonom, ako je primjenjivo.

(4) Obavezan sadržaj Studije je i eventualni uticaj projekta na životnu sredinu entiteta ili prekogranični uticaj, saglasno ovom Zakonu.

Član 67.

(Podnošenje Studije nadležnom odjeljenju i obavještanje javnosti)

(1) Podnosilac zahtjeva dostavlja nadležnom odjeljenju po jedan primjerak Studije u štampanoj i elektronskoj formi u roku od 30 dana od dana izrade Studije.

(2) Nadležno odjeljenje je dužno da u roku od 15 dana od objavi Studiju na Internet stranici Vlade.

Član 68.

(Javna rasprava)

(1) Nadležno odjeljenje obavještava i poziva javnost na javnu raspravu o Studiji.

(2) Poziv za javnu raspravu se dostavlja najmanje 15 dana prije dana održavanja javne rasprave.

(3) Sugestije i primjedbe javnosti dostavljaju se nadležnom odjeljenju pismeno u roku od 15 dana od dana održavanja javne rasprave.

(4) Nadležno odjeljenje dužno je, ukoliko je to moguće, organizovati javnu raspravu o projektu na mjestu koje je najbliže lokaciji projekta za koji je izrađena Studija.

(5) Nadležno odjeljenje dužno je sačiniti zapisnik o održanoj javnoj raspravi najkasnije u roku od 7 dana od dana održavanja.

Član 69.

(Stručna komisija)

(1) Ocjenu Studije vrši Stručna komisija sastavljena od zaposlenika nadležnog Odjeljenja, koju imenuje šef nadležnog Odjeljenja (u daljem tekstu: komisija).

(2) U komisiju može biti imenovano lice sa visokom stručnom spremom odgovarajuće struke koje nije zaposlenik nadležnog odjeljenja, ukoliko je po ocjeni komisije za ocjenu studije neopodno angažovati druge stručnjake.

(3) Komisija ocjenjuje Studiju u roku od 30 dana od dana održavanja javne rasprave.

(4) Studija za koju komisija utvrdi da sadrži nedostatke vraća se podnosiocu zahtjeva na doradu zajedno s instrukcijama komisije i dostavljenim primjedbama nadležnih organa i zainteresovane javnosti.

(4) Ukoliko dorađena Studija ne bude odobrena, novi zahtjev sa novom Studijom može biti podnesen najranije po proteku perioda od tri mjeseca od dana dostavljanja rješenja kojim se Studija odbija.

Član 70.

(Odobranje Studije)

(1) Nadležno odjeljenje rješenjem odobrava Studiju u roku od 30 dana od dana ocjenjivanja Studije od strane komisije.

(2) Studija neće biti odobrena ukoliko:

- a) se utvrdi da bi projekt mogao izazvati značajno onečišćenje životne sredine ili u značajnoj mjeri ugroziti životnu sredinu;
- b) projekat nije u skladu sa strategijom zaštite životne sredine i akcionim planom zaštite životne sredine Distrikta;
- c) projekat nije suglasan sa međunarodnim obavezama Bosne i Hercegovine po pitanju zaštite životne sredine; i
- d) u slučaju da Studija nije izrađena u skladu sa ovim Zakonom.

(3) Rješenje o odobravanju ili odbijanju Studije dostavlja se podnosiocu zahtjeva i zainteresovanoj javnosti.

(4) Dostavljanje rješenja iz stava (3) ovog člana provodi se saglasno odredbama Zakona o upravnom postupku Brčko distrikta Bosne i Hercegovine i objavljuje na Internet stranici Vlade.

(5) Nadležno odjeljenje će rješenje dostaviti drugoj državi posredstvom nadležnog organa Bosne i Hercegovine, u slučaju utvrđenog prekograničnog uticaja na životnu sredinu.

Član 71.

(Prestanak važenja rješenja o odobravanju Studije)

Rješenje o odobravanju Studije prestaje da važi ukoliko podnosilac zahtjeva ne pribavi odobrenje za građenje u roku od tri godine od dana prijema rješenja.

Član 72.

(Troškovi nastali u postupku procjene uticaja)

(1) Troškove obavještanja i omogućavanja učešća javnosti u postupku procjene uticaja i druge troškove nastale u postupku procjene uticaja, snosi podnosilac zahtjeva.

(2) Posebnim Pravilnikom koji donosi Vlada na prijedlog nadležnog Odjeljenja utvrdit će se troškovi i metodologija obračuna troškova nastalih u postupku procjene uticaja.

Član 73.

(Mogući uticaj projekta na životnu sredinu u entitetima i prekograničnog uticaja na životnu sredinu)

(1) Pravila koja se odnose na procjenu uticaja u kontekstu prekograničnog uticaja primjenjuju se i kada postoji obaveza Bosne i Hercegovine po međunarodnim ugovorima i bilateralnim sporazumima.

(2) Kada nosilac izrade Studije utvrdi da projekat može imati značajan uticaj na životnu sredinu druge države ili entitet, dužan je izraditi posebno poglavlje u Studiji sa procjenom uticaja na životnu sredinu druge države ili entitet.

(3) Nadležno odjeljenje dužno je osigurati učešće organa nadležnih za zaštitu životne sredine entiteta i druge države i zainteresovane javnosti entiteta i druge države posredstvom organa Bosne i Hercegovine nadležnog za pitanja zaštite životne sredine.

POGLAVLJE VIII - EKOLOŠKA DOZVOLA

Član 74.

(Cilj i svrha izdavanja ekološke dozvole)

(1) Ekološka dozvola je upravni akt koju izdaje nadležno Odjeljenje u cilju kompletne zaštite životne sredine sa ciljem osiguravanja mjera za sprečavanje i smanjenje industrijskih emisija u zrak, vodu, tlo, smanjenje uticaja na stanovništvo, biljni i životinjski svijet i sprječavanje stvaranja otpada i buke kako bi se ostvario visok nivo zaštite životne sredine kao cjeline.

(2) Pogon ili postrojenje za koje je neophodno pribavljanje ekološke dozvole, ne može biti pušteno u rad odnosno ne može pribaviti upotrebnu dozvolu bez ekološke dozvole.

(3) Ekološka dozvola se izdaje i u slučaju značajne promjene u radu pogona i postrojenja.

(4) Ekološka dozvola se ne izdaje za istraživačke aktivnosti, razvojne aktivnosti ili za testiranje novih proizvoda i procesa.

(5) Vlada, na prijedlog nadležnog Odjeljenja, donosi Pravilnik kojim utvrđuje pogone i postrojenja koji mogu pušteni u rad samo ukoliko imaju ekološku dozvolu izdatu u skladu sa odredbama ovog zakona.

Član 75.

(Opšte obaveze operatera)

(1) U svrhu kompletne zaštite životne sredine od štetnih uticaja djelatnosti koje se obavljaju u pogonu i postrojenju, operater je dužan osigurati da pogoni i postrojenja budu izgrađeni i funkcionišu tako da se:

a) ne ugrožava zdravlje ljudi, ostvaruje povoljno stanje flore i faune, ne dovode do gubitka staništa organizama koji se nalaze na području uticaja postrojenja ili ne ugrožava životna sredina zbog emisije supstanci, buke, mirisa, vibracija ili topline, saobraćaja ili od pogona i postrojenja;

b) poduzmu sve odgovarajuće preventivne mjere za sprječavanje zagađenja i ne prouzrokuju zagađenja iznad graničnih vrijednosti;

c) izbjegava stvaranje otpada, njegova količina svodi na najmanju moguću mjeru, stvoreni otpad ponovno koristi, reciklira ili odlaže na način da se izbjegne i smanji negativan uticaj na životnu sredinu;

d) efikasno koriste energetske i prirodne resurse;

e) poduzmu mjere za sprječavanje nesreća i ograničavanje njihovih posljedica; i

f) poduzmu mjere nakon prestanka rada postrojenja za izbjegavanje rizika od onečišćenja i za povrat lokacije na kojoj se nalazi pogon i postrojenje, u zakonom propisano stanje životne sredine.

(2) Ciljevi predviđeni u stavu (1) ovog člana predstavljaju opće obaveze operatera koje je operater dužan ispuniti tokom izgradnje, rada, održavanja i prestanka rada pogona i postrojenja.

(3) Za pogone i postrojenja za koje nije potrebno pribavljanje ekološke dozvole, nadležno odjeljenje će pri izdavanju drugih potrebnih odobrenja ili dozvola uzeti u obzir ispunjenje ciljeva iz stava (1) ovog člana.

Član 76. **(Objedinjavanje ekološke dozvole)**

(1) Za više pogona i postrojenja na istoj lokaciji kojim upravlja isti operater može se podnijeti jedan zahtjev za izdavanje ekološke dozvole.

(2) Zahtjev za izdavanje ekološke dozvole može podnijeti i više operatera, ako je pogon ili postrojenje tehnološka cjelina koju čini više dijelova postrojenja kojima upravljaju različiti operateri.

(3) U slučaju iz stava (2) ovog člana, ekološkom dozvolom se utvrđuju obaveze i odgovornosti svakog operatera posebno, a svi operateri smatraju se titularima iste ekološke dozvole i ista se dostavlja svim operaterima.

(4) Operater može podnijeti zahtjev za objedinjavanje ekološke dozvole prilikom obnavljanja ekološke dozvole, ukoliko nijednoj od dozvola čije se objedinjavanje traži nije istekao period važenja.

(5) Ako se ekološka dozvola izdaje za pogone ili postrojenja iz stava (1) ovog člana, svako postrojenje mora ispunjavati uvjete propisane ovim zakonom.

Član 77. **(Zahtjev za izdavanje ekološke dozvole)**

(1) Zahtjev za izdavanje ekološke dozvole podnosi se nadležnom odjeljenju u jednom primjerku u pisanoj formi i u jednom primjerku u elektronskoj formi.

(2) Zahtjev za izdavanje ekološke dozvole sadrži:

- a) podatke o podnosiocu zahtjeva, naziv i sjedište operatera ili investitora, ime osobe ovlaštene za zastupanje, broj telefona i e-mail adresu; i
- b) lokaciju pogona i postrojenja.

(3) Uz zahtjev iz stava (1) ovog člana prilaže se dokumentacija koja sadrži slijedeće podatke:

- a) opis pogona i postrojenja (plan, opis pogona i postrojenja, tehnički opis rada, kapacitet postrojenja i tome slično);
- b) opis osnovnih i pomoćnih sirovina, ostalih tvari i energije koja se koristi ili koju proizvodi pogon i postrojenje;
- c) opis stanja lokacije pogona i postrojenja;
- d) opis izvora emisija, priroda i količine emisija iz pogona i postrojenja na sve komponente životne sredine (zrak, voda, tlo i slično) odnosno izvještaj o nultom stanju, kao i identifikacija značajnih uticaja na životnu sredinu;

- e) opis predloženih mjera, tehnologija i drugih tehnika za sprječavanje ili ukoliko to nije moguće, smanjenje emisija iz postrojenja;
- f) opis mjera za sprječavanje produciranja otpada kao i za povrat korisnog materijala iz otpada koje producira postrojenje;
- g) opis ostalih mjera radi usklađivanja s osnovnim obavezama operatera, posebno mjera nakon zatvaranja ili rušenja pogona i postrojenja;
- h) opis planiranih mjera za smanjenje emisija i opis planiranog monitoringa;
- i) izvod iz planskog akta relevantan za zaštitu životne sredine;
- j) pravomoćni vodni akt ukoliko je primjenjivo;
- k) netehnički rezime;
- l) plan upravljanja otpadom, ukoliko je primjenjivo;
- m) izvještaj o stanju sigurnosti i/ili plan za sprječavanje nesreća većih razmjera, ukoliko se radi o pogonu ili postrojenju koje može izazvati nesreću većih razmjera.

(4) U slučaju kada se za novi pogon i postrojenje ili znatnu promjenu postojećeg pogona ili postrojenja provodi procjena uticaja, sve relevantne informacije prikupljene u postupku procjene uticaja prilažu se uz zahtjev za izdavanje ekološke dozvole, uključujući Studiju i rješenje o odobrenju Studije, ukoliko je izrada iste bila neophodna.

(5) Zahtjev za izdavanje ekološke dozvole izrađuje ovlašteno lice za operatera.

Član 78.

(Postupak po prijemu zahtjeva za izdavanje ekološke dozvole)

(1) Ukoliko zahtjev ne sadrži propisane podatke ili dokumentaciju iz člana 77. ovog Zakona, nadležno odjeljenje će zatražiti od podnosioca zahtjeva da dostavi podatke ili dokumentaciju koji nedostaju.

(2) Ukoliko podnosilac zahtjeva ne dostavi tražene podatke ili dokumentaciju u naznačenom roku, nadležno odjeljenje će donijeti zaključak kojim se zahtjev za izdavanje ekološke dozvole odbacuje.

(3) Na sve radnje u postupku koje nisu regulirane ovim Zakonom, shodno se primjenjuje Zakon o upravnom postupku Brčko distrikta Bosne i Hercegovine.

Član 79.

(Sudjelovanje javnosti)

(1) Nadležno odjeljenje obavještava zainteresovanu javnost o podnesenom zahtjevu za izdavanje ekološke dozvole i objavljuje zahtjev sa priloženom dokumentacijom na Internet stranici Vlade.

(2) Zainteresovana javnost ima pravo u roku od 30 dana od dana objavljivanja informacije iz stava (1) ovog člana, dostaviti nadležnom odjeljenju mišljenja, primjedbe i sugestije o zahtjevu i priloženoj dokumentaciji u pismenoj formi.

Član 80.

(Izdavanje ekološke dozvole)

(1) Nadležno odjeljenje izdaje ekološku dozvolu u roku od 90 dana od dana prijema urednog zahtjeva.

(2) Ekološka dozvola sadrži:

- a) granične vrijednosti emisija onečišćujuće supstance zasnovane na važećim propisima ili najboljim raspoloživim tehnikama, po svakoj emisijskoj tački;
- b) mjere za zaštitu svih komponenti životne sredine koje su pogođene emisijom;
- c) mjere za upravljanje otpadom koji proizvodi pogon i postrojenje, ako je primjenjivo;
- d) mjere zaštite od buke i vibracija, ako je primjenjivo;
- e) mjere za sprječavanje ili minimiziranje prekograničnog onečišćenja životne sredine;
- f) sistem praćenja emisija uz određivanje metodologije i učestalosti mjerenja;
- g) uslove i mjere za sprječavanje nesreća velikih razmjera, ako je primjenjivo;
- h) mjere sanacije nakon prestanka rada postrojenja; i
- i) mjere vezane za uvjete rada u izvanrednim situacijama
- j) iznos osiguranja za eventualnu štetu prouzrokovanu zagađenjem životne sredine, ako je primjenjivo.

(3) Kada standard kvaliteta životne sredine zahtjeva strožije mjere u odnosu na one koje su utvrđene posebnim propisima kojima su regulirane granične vrijednosti emisija, u ekološku dozvolu se unose dodatne ili strožije mjere kako bi se postigao standard kvaliteta životne sredine.

(4) Kada standard kvaliteta životne sredine zahtjeva strožije mjere u odnosu na one koje su ostvarive primjenom najboljih raspoloživih tehnika, u ekološku dozvolu se uključuju dodatne ili strožije mjere koje mogu da se odnose na ograničenje radnih sati, korištenje manje onečišćujućih goriva i tome slično.

(5) Sve mjere sadržane u ekološkoj dozvoli su obavezno praćene utvrđenim rokom za njihovu realizaciju.

(6) Nacrt rješenja o izdavanju ekološke dozvole, objavljuje se na Internet stranici Vlade.

(7) Rok za dostavu sugestija i mišljenja javnosti na nacrt rješenja je 8 dana od dana objave.

Član 81.

(Dostava ekološke dozvole i pravo na žalbu)

(1) Ekološka dozvola se dostavlja istovremeno podnosiocu zahtjeva, nadležnom inspektor, zainteresovanim organima i zainteresovanoj javnosti koja je sudjelovala u postupku.

(2) Ekološka dozvola se izdaje na period od pet godina.

(3) Protiv rješenja o izdavanju ekološke dozvole dopuštena je žalba koja se podnosi Apelacionoj komisiji.

Član 82.

(Obaveze operatera nakon pribavljene ekološke dozvole)

(1) Operater je dužan da provodi praćenje emisija i uticaja koje izazivaju pogon i postrojenje.

(2) Operater je dužan osigurati provjeru usklađenosti rada pogona i postrojenja saglasno rokovima, mjerama i praćenjem kako su predviđeni ekološkom dozvolom.

(3) Operater je dužan dostavljati nadležnom odjeljenju izvještaj o izvršenom mjerenju emisija u zrak, godišnji izvještaj o vrstama, količini na načinu zbrinjavanja otpada, izvještaj o monitoringu buke i drugim mjerama propisanim ekološkom dozvolom.

(4) Operater je dužan otkloniti nedostatke utvrđene prilikom nadzora rada pogona i postrojenja bez odlaganja.

(5) Operater dostavlja nadležnom odjeljenju izvještaj o postupanju po osnovu izvršenog inspekcijskog nadzora i poduzetim sanacijskim mjerama koje su naložene u slučaju utvrđenih nedostataka.

(6) Operater je dužan osigurati odgovarajuće održavanje pogona i postrojenja, kao i redovnu kontrolu nad radom tehničkih uređaja.

(7) U slučaju nesreća koje vode prekoračenju graničnih vrijednosti emisija, operater je dužan bez odlaganja poduzeti sanacijske mjere s ciljem ponovnog uspostavljanja usklađenosti sa ekološkom dozvolom i propisima.

(8) Ukoliko nesreća može prouzrokovati ozbiljnu prijetnju po ljudsko zdravlje ili životnu sredinu operater je dužan smanjiti ili privremeno obustaviti rad pogona i postrojenja.

Član 83.

(Odbacivanje odnosno odbijanje zahtjeva za izdavanje ekološke dozvole)

(1) Nadležno odjeljenje će odbaciti zahtjev za izdavanje ekološke dozvole ukoliko zahtjev nije blagovremeno upotpunjen.

(2) Nadležno odjeljenje će odbiti zahtjev za izdavanje ekološke dozvole ukoliko:

a) zahtjev sadrži netačne podatke koji su od uticaja za izdavanje dozvole; i

b) zahtjev nije praćen zahtjevanom dokumentacijom iz koje se nesumnjivo mogu utvrditi uticaji na životnu sredinu odnosno nije sačinjen u skladu sa pravnim, ekološkim i zdravstvenim standardima.

(3) Rješenje kojim se zahtjev za izdavanje ekološke dozvole odbija dostavlja se podnosiocu u roku od sedam dana od dana donošenja rješenja i o tome se obavještava nadležni inspektor.

Član 84.

(Obnavljanje ekološke dozvole)

(1) Obnavljanje ekološke dozvole vrši se na zahtjev operatera koji se podnosi nadležnom odjeljenju najkasnije 90 dana prije isteka perioda važenja važeće ekološke dozvole.

(2) Nadležno odjeljenje vrši obnavljanje ekološke dozvole svakih pet godina.

(3) Operater uz zahtjev za obnavljanje ekološke dozvole, pored identifikacijskih podataka, adrese, kontakt telefona i e-mail adrese, dostavlja izvještaj o praćenju i vršenju mjerenja predviđenih ekološkom dozvolom.

(4) Nakon razmatranja zahtjeva i informacija iz izvještaja dostavljenih od strane operatera koji podnosi zahtjev za obnavljanje ekološke dozvole, nadležno odjeljenje:

- a) u roku od 60 dana izdaje obnovljenu ekološku dozvolu; ili
- b) odbija zahtjev za obnavljanje ekološke dozvole.

(5) Ukoliko operater ne podnese zahtjev za obnavljanje ekološke dozvole saglasno odredbama stava (1) ovog člana, nadležno odjeljenje donosi rješenje kojim se utvrđuje prestanak važenja ekološke dozvole i o tome izvještava nadležnog inspektora.

(6) Odredbe o učešću javnosti u postupku pribavljanja ekološke dozvole shodno se primjenjuju u postupku obnavljanja ekološke dozvole.

Član 85.

(Ponovno razmatranje i izmjene ekološke dozvole)

(1) Nadležno odjeljenje ponovno razmatra odnosno revidira uslove definisane ekološkom dozvolom i vrši izmjene ekološke dozvole, ukoliko:

- a) je došlo do značajnih promjena u najboljim raspoloživim tehnikama koje omogućuju znatno smanjenje štetnih emisija; ili
- b) sigurnost odvijanja rada i djelatnosti zahtjeva upotrebu drugih tehnologija.

(2) Nadležno odjeljenje može ponovno razmatrati ekološku dozvolu, ukoliko postoji zahtjev nadležnog inspektora i zainteresiranih strana koje žive na području rada pogona i postrojenja, kojim se tvrdi da rad pogona i postrojenja može imati negativan uticaj i ugrožavati ili predstavljati opasnost po životnu sredinu i zdravlje.

(3) Ukoliko su izmjene pogona i postrojenja radi prilagodbe zahtjevima u području zaštite životne sredine moguće i rezultirale bi manje štetnim uticajima na životnu sredinu i zdravlje, nadležno odjeljenje nalaže operateru izradu plana prilagodbe sa mjerama i rokovima dostizanja najboljih raspoloživih rezultata i usklađivanje sa odredbama ovog zakona i provedbenih propisa.

(4) Odredbe o učešću javnosti u postupku pribavljanja ekološke dozvole shodno se primjenjuju i u postupku ponovnog razmatranja i izmjena ekološke dozvole.

Član 86.

(Promjena u radu)

(1) Ukoliko operater pogona i postrojenja tokom trajanja važenja izdate ekološke dozvole planira promjenu prirode ili funkcionisanja postrojenja ili proširenje postrojenja ili promjenu sirovine koje može uticati na okoliš, dužan je o tome pismeno obavijestiti nadležno odjeljenje.

(2) Obavještenje iz stava (1) ovog člana sadrži podatke o postojećem pogonu i postrojenju i planiranoj promjeni rada uključujući i druge podatke važne za utvrđivanje značaja promjene u radu.

(3) Ako prilikom razmatranja zahtjeva utvrdi da proizvodnja, upotreba energije, korištenje vode, korištenje prostora, emisije ili proizvodnja otpada prelazi 25% od ranije utvrđenih vrijednosti, nadležno odjeljenje će utvrditi da je promjena u radu značajna.

(4) Ukoliko su za utvrđivanje da li je promjena u radu značajna potrebne dodatne stručne kvalifikacije, nadležno odjeljenje može zatražiti od operatera da dostavi mišljenje lica ovlaštenog za izradu akata iz oblasti zaštite životne sredine, o mogućim uticajima predložene promjene na životnu sredinu.

(5) Nadležno odjeljenje će u roku od 30 dana od dana dobijanja potrebnih podataka odlučiti o tome da li je promjena značajna te o tome obavijestiti operatera i pozvati ga da podnese novi zahtjev za izdavanje ekološke dozvole koji će sadržavati podatke o postojećem i planiranom dijelu pogona i postrojenja.

(6) Na postupak izdavanja ekološke dozvole u slučaju promjene u radu shodno se primjenjuju odredbe ovog zakona o izdavanju ekološke dozvole.

Član 87. (Prestanak rada)

(1) Kada pogon i postrojenje za koje je izdata ekološka dozvola prestane sa radom, operater je dužan postupiti saglasno ekološkoj dozvoli te o tome obavijestiti nadležno odjeljenje i inspektora u pisanoj formi.

(2) Stečajni upravnik obavještava nadležno odjeljenje o pokrenutom stečajnom postupku kao i o mogućnosti provođenja mjera i praćenja navedenih u ekološkoj dozvoli.

(3) Nakon što nadležno odjeljenje utvrdi da su okolnosti iz stava (1) ovog člana ispunjeni, donosi rješenje o prestanku važenja ekološke dozvole te rješenje objavljuje na Internet stranici Vlade.

Član 88. (Prestanak važenja ekološke dozvole)

(1) Ekološka dozvola prestaje da važi ukoliko:

- a) operater podnose zahtjev za prestanak važenja ekološke dozvole;
- b) se utvrdi da operater nije obavijestio nadležno odjeljenje o značajnim promjenama na pogonu i postrojenju;
- c) operater prestane da ispunjava uvjete i mjere utvrđene u ekološkoj dozvoli;
- d) nadležni inspektor utvrdi da operater ne ispunjava obaveze iz ekološke dozvole;
- e) se naknadno utvrdi da je operater dobio ekološku dozvolu na osnovu pogrešnih i lažnih podataka ili krivotvorene dokumentacije;
- f) pogon i postrojenje za koje je izdata ekološka dozvola ne radi duže od jedne godine;
- g) operater ne vrši monitoring i ne dostavlja izvještaje o mjerenjima u rokovima kako su utvrđeni ekološkom dozvolom odnosno ne provodi druge obaveze utvrđene ekološkom dozvolom;
- h) operater ne postupi po nalogu nadležnog inspektora prema zapisniku o izvršenom inspekcijском pregledu; i
- i) je okončan postupak likvidacije.

(2) Ako se utvrdi postojanje jedne ili više okolnosti iz stava (1) ovog člana, nadležno odjeljenje donosi rješenje o prestanku važenja ekološke dozvole, koje dostavlja operateru i nadležnom inspektor.

(3) Protiv rješenja o prestanku važenja ekološke dozvole dopuštena je žalba Apelacionoj komisiji.

(4) Žalba na rješenje o prestanku važenja ekološke dozvole ne odgađa izvršenje.

(5) Rješenjem o prestanku važenja ekološke dozvole uvrđuje se obaveza i obveznik izvršenja mjera sanacije za pogon, postrojenje i lokaciju na kojem se pogon i postrojenje nalaze, poslije prestanka aktivnosti, kako bi se izbjegao rizik po životnu sredinu, zdravlje i materijalna dobra.

Član 89. (Postojeći pogoni i postrojenja)

Postojeći pogoni i postrojenja koji nemaju ekološku dozvolu iako su obveznici pribavljanja ekološke dozvole, prilikom izdavanja ekološke dozvole tretirat će se kao nova postrojenja i ispunjavaće sve ovim Zakonom propisane zahtjeve te biti usklađeni sa najboljim raspoloživim tehnikama.

Član 90. (Granične vrijednosti emisija)

Granične vrijednosti emisija koje su propisane i sadržane u ekološkoj dozvoli, zasnovane su na propisima kojima se definiraju granične vrijednosti emisija, a koji se usaglašavaju sa najboljim raspoloživim tehnikama (BAT (Best Available Technics)).

Član 91. (Najbolje raspoložive tehnike)

(1) Najbolje raspoložive tehnike se utvrđuju u formi tehničkih uputa.

(2) Vlada, na prijedlog nadležnog odjeljenja donosi Pravilnik kojim se utvrđuju djelatnosti za koje se utvrđuju najbolje raspoložive tehnike, odnos sa referentnim dokumentima za najbolje raspoložive tehnike i primjena drugih dokumenata o najboljim raspoloživim tehnikama, kriterijima za određivanje najboljih raspoloživih tehnika, sadržaju tehničkih uputa o najboljim raspoloživim tehnikama i donošenju odluka i način rada radnih grupa za izradu i ažuriranje tehničkih uputa o najboljim raspoloživim tehnikama.

(3) Tehničke upute pripremaju radne grupe za najbolje raspoložive tehnike, čije članove imenuje Vlada na prijedlog nadležnog odjeljenja.

(4) Novi pogoni i postrojenja od samog početka izgradnje i puštanja u rad moraju zadovoljavati uvjete navedene u najboljim raspoloživim tehnikama, dok se postojećim pogonima i postrojenjima određuje vremenski rok za postizanje uslova najboljih raspoloživih tehnika.

(5) Za djelatnosti za koje nisu definirane najbolje raspoložive tehnike u skladu sa stavom (2) ovog člana, primjenjuju se najbolje tehnike EU.

(6) Sve informacije o razvoju tehničkih uputa su dostupne javnosti.

Član 92.

(Registar ekoloških dozvola)

- (1) Nadležno odjeljenje uspostavlja i vodi Registar izdatih ekoloških dozvola.
- (2) Vlada, na prijedlog nadležnog odjeljenja pravilnikom utvrđuje sadržaj i način vođenja Registra ekoloških dozvola.

POGLAVLJE IX - SPRJEČAVANJE NESREĆA VELIKIH RAZMJERA

Član 93.

(Sprječavanje i nadzor nesreća velikih razmjera)

- (1) Operater pogona i postrojenja, uključujući skladišta koji mogu izazvati nesreće velikih razmjera, zbog prisustva opasnih supstanci u količinama iznad graničnih vrijednosti utvrđenih posebnim propisima, dužan je da:
 - a) dostavi nadležnom odjeljenju podatke o svim prijetećim opasnostima od štete u životnoj sredini ili o sumnji na takvu opasnost;
 - b) poduzme potrebne mjere sa ciljem sprečavanja opasnosti od nesreće velikih razmjera;
 - c) traži upute o potrebnim mjerama koje je neophodno poduzeti.
- (2) Operater je dužan u bilo koje vrijeme nadležnom odjeljenju i nadležnom inspektoru dostaviti dokaze o poduzetim mjerama.
- (3) Ukoliko nadležno odjeljenje dobije informacije o prijetećoj opasnosti od štete po životnu sredinu, a ne može utvrditi operatera ili operater ne snosi odgovornost, nadležno odjeljenje je dužno obavijestiti Odjeljenje za javnu sigurnost i nadležnog inspektora.

Član 94.

(Obaveza operatera pogona ili postrojenja koje može izazvati nesreće velikih razmjera)

- (1) Operater pogona i postrojenja ili skladišta iz člana 93. stav (1) ovog Zakona, dužan je nadležnom odjeljenju dostaviti obavještenje sa slijedećim podacima:
 - a) ime odgovornog lica i adresu pogona i postrojenja;
 - b) adresu registrovanog mjesta sjedišta poslovanja pogona i postrojenja, ukoliko adresa pogona i postrojenja nije ista;
 - c) informacije o prisutnim opasnim supstancama ili kategorija supstanci u pogonu, postrojenju ili skladištu;
 - d) količinu i fizički oblik opasnih supstanci u pogonu i postrojenju ili skladištu;
 - e) opis pogona, postrojenja i skladišnog prostora; i
 - f) neposredno okruženje pogona, postrojenja ili skladišta koji mogu prouzrokovati nesreću velikih razmjera ili pogoršati njene posljedice.
- (2) Podaci iz stava (1) ovog člana dostavljaju se nadležnom odjeljenju uz zahtjev za izdavanje ekološke dozvole.
- (3) U slučaju značajnog povećanja u količini ili značajne promjene u prirodi ili fizičkom obliku prisutne opasne supstance ili svake promjene postupka u kojem se koristi opasna supstanca, promjene u radu pogona i postrojenja ili uređaja koja bi mogla znatno uticati na

opasnost od nesreća velikih razmjera ili trajnog zatvaranja postrojenja, operater je dužan bez odlaganja obavijestiti nadležno odjeljenje.

Član 95. **(Obavještavanje o nesrećama velikih razmjera)**

(1) Operater pogona i postrojenja dužan je u što kraćem roku obavijestiti nadležno odjeljenje, organ nadležan za pitanja civilne zaštite i nadležnog inspektora, te dostaviti podatke o:

- a) okolnostima nesreće;
- b) prisutnim opasnim supstancama;
- c) procjeni uticaja nesreće na ljude i životnu sredinu; i
- d) preduzetim hitnim mjerama.

(2) Operater je dužan obavijestiti nadležno odjeljenje o preduzetim mjerama za ublažavanje posljedica nesreće i sprečavanje pojave novih nesreća.

(3) Operater je dužan svaku novu informaciju vezanu za nesreću dostaviti nadležnom odjeljenju, Odjeljenju za javnu sigurnost i nadležnom inspektoru.

(4) Fizička ili pravna lica koja su pogođena ili postoji vjerovatnost da će biti pogođena štetom u životnoj sredini, koja imaju opravdan interes u vezi sa odlukama o životnoj sredini koja se odnose na štetu nastalu nesrećom velikih razmjera ili koja se pozivaju na povrede prava imaju pravo prijaviti nadležnom inspektoru sve slučajeve štete u životnoj sredini ili opasnosti od štete koje su im poznate, kao i zahtjevati poduzimanje mjera kako bi se šteta spriječila odnosno kako bi se smanjila šteta prouzrokovana nesrećom velikih razmjera.

Član 96. **(Plan sprečavanja nesreća velikih razmjera)**

(1) Operater pogona i postrojenja iz člana 93. ovog zakona, dužan je pripremiti plan sprječavanja nesreća velikih razmjera (u daljem tekstu: plan) i osigurati provođenje plana kojim se postiže visok nivo zaštite ljudi i životne sredine putem odgovarajućih sredstava, struktura i sistema upravljanja, organizacije i kadrova, identifikacije i procjene opasnosti, nadzora rada, planiranja interventnih mjera i provođenja monitoringa pogona i postrojenja.

(2) Operater je dužan pripremiti plan te izvršiti procjenu stanja sigurnosti za nove pogone i postrojenja u roku od najmanje tri mjeseca prije početka gradnje, odnosno za postojeće pogone i postrojenja u roku od najmanje šest mjeseci od dana stupanja na snagu ovog zakona.

(3) Plan za postrojenja iz stava (1) ovog člana, uključujući i skladišta dostavlja se nadležnom odjeljenju i inspektoru i Odjeljenju za javnu sigurnost uz zahtjev za izdavanje ekološke dozvole.

Član 97. **(Izveštaj o stanju sigurnosti)**

(1) Za pogone i postrojenja u kojima su prisutne opasne supstance u količinama utvrđenim posebnim propisima, operater je dužan sačiniti izvještaj o stanju sigurnosti kojim se utvrđuju:

- a) plan sprječavanja nesreća velikih razmjera i sistem sigurnosnog upravljanja za njegovo provođenje;
- b) procjena rizika pojave nesreće velikih razmjera te poduzete mjere za njihovo identificiranje i ograničavanje posljedica;
- c) sigurnosne mjere uključene u projektovanje, gradnju, funkcionisanje i održavanje pogona i postrojenja; i
- d) plan intervencija.

(2) Operater revidira izvještaj o stanju sigurnost najmanje svake tri godine.

(3) Na zahtjev nadležnog odjeljenja ili inspektora, operater je dužan sačiniti izmjene izvještaja o stanju sigurnosti s obrazloženjem za novonastale okolnosti i nove tehnologije u vezi sa pitanjima sigurnosti.

(4) Izvještaj o stanju sigurnosti za postojeće pogone i postrojenja se dostavlja nadležnom odjeljenju, Odjeljenju za javnu sigurnosti i inspektoru najkasnije u roku od šest mjeseci od dana stupanja na snagu ovog zakona.

(5) Odjeljenje za javnu sigurnost objavljuje izvještaj o stanju sigurnosti na Internet stranici Vlade.

Član 98.

(Promjene u radu pogona i postrojenja)

(1) U slučaju promjena u radu pogona i postrojenja ili promjena količine opasnih supstanci koje mogu uzrokovati nesreće velikih razmjera operater je dužan preispitati i, ukoliko je neophodno, ažurirati plan.

(2) U slučaju prestanka rada pogona ili postrojenja, operater je dužan pismeno obavijestiti nadležno odjeljenje o ispunjavanju uvjeta predviđenih ekološkom dozvolom koji se odnose na mjere poduzete nakon što je postrojenje prestalo sa radom.

Član 99.

(Postupak u slučaju prestanka rada pogona i postrojenja)

(1) Po konačnom obustavljanju aktivnosti pogona i postrojenja za koje je izdata ekološka dozvola, operater putem ovlaštenih lica vrši procjenu stanja kontaminacije tla i podzemnih voda opasnim supstancama koje su korištene ili su proizvedene u postrojenju ili su ispuštane iz postrojenja.

(2) Kada je postrojenje uzrokovalo značajno zagađenje tla ili podzemnih voda opasnim supstancama u poređenju sa nultim stanjem, operater je dužan poduzeti potrebne mjere za sanaciju tog stanja, kako bi se lokacija vratila u prvobitno stanje.

(3) Nakon konačnog obustavljanja aktivnosti u pogonu i postrojenju i u slučaju kada kontaminacija tla i podzemnih voda na lokaciji predstavlja značajnu prijetnju zdravlju ili životnoj sredini kao rezultat aktivnosti koje je obavljao operater i uzimajući u obzir uvjete lokacije pogona i postrojenja utvrđene nultim stanjem, operater je dužan poduzeti potrebne radnje sa ciljem uklanjanja, kontrole, ograničavanja ili smanjenja prisustva opasnih supstanci tako da lokacija, uzimajući u obzir njeno trenutno i buduće korištenje, ne predstavlja rizik.

(4) Nadležno odjeljenje će javnosti učiniti dostupnim informacije o mjerama poduzetim od strane operatera nakon konačne obustave aktivnosti pogona i postrojenja.

Član 100. (Informacije o sigurnosnim mjerama)

(1) Operator je dužan dostaviti informacije o sigurnosnim mjerama nadležnom odjeljenju i Odjeljenju za javnu sigurnost, pravnim i fizičkim licima na koje može uticati nesreća velikih razmjera, kao rezultat rada pogona i postrojenja odnosno kao rezultat uskladištenih opasnih supstanci.

(2) Informacija o sigurnosnim mjerama se revidira svake tri godine ili se ažurira po potrebi u slučaju promjena u radu pogona i postrojenja u roku od šest mjeseci nakon izvršene promjene.

(3) Informacije iz stava (1) ovog člana nadležno odjeljenje objavljuje na Internet stranici Vlade.

Član 101. (Domino učinak)

(1) Na osnovu izvještaja o stanju sigurnosti, Odjeljenje za javnu sigurnost i nadležno odjeljenje je dužno identifikovati pogone i postrojenja ili skladišta u kojima postoji mogućnost pojave posljedica izazvanih nesrećom velikih razmjera ili ta mogućnost može biti povećana zbog lokacije ili blizine takvog pogona ili postrojenja, te izvršiti identifikaciju opasnih supstanci.

(2) Vlada, na prijedlog šefa nadležnog odjeljenja, usvaja Pravilnik kojim će utvrditi detaljan sadržaj izvještaja o sigurnosnim mjerama i sadržaj planova intervencije.

(3) Odjeljenje za javnu sigurnost i nadležno odjeljenje su dužni osigurati razmjenu informacija o identifikaciji pogona i postrojenja što bi trebalo omogućiti operaterima da pri izradi plana sprečavanja nesreća velikih razmjera, razmotre ukupan rizik i mogućnost pojave takvih nesreća.

(4) Operateri pogona i postrojenja iz stava (1) ovog člana dužni su surađivati na informisanju javnosti i dostavljanju informacija nadležnom odjeljenju radi pripreme kako internih tako i vanjskih planova intervencije.

Član 102. (Interni i vanjski planovi intervencije)

(1) Operater je dužan izraditi interni plan intervencije sa sadržanim mjerama koje će se poduzeti u slučaju nesreće velikih razmjera i dostaviti ga nadležnom odjeljenju i Odjeljenju za javnu sigurnost radi izrade vanjskih planova intervencije za mjere koje će se poduzeti izvan pogona i postrojenja.

(2) Plan interne i vanjske intervencije uključuje mjere koje se imaju poduzeti radi:

- a) kontrolisanja nesreće na način da se posljedice takve nesreće svedu na najmanju moguću mjeru i ograniči njihov štetan uticaj na ljude, životnu sredinu i imovinu;
- b) informisanje javnosti i nadležnih službi; i

c) omogućavanju revitalizacije i sanacije nakon nesreće većih razmjera.

(3) Prilikom izrade internih i vanjskih planova mora se uzeti u obzir udaljenost između pogona i postrojenja od stambenih područja, javnih mjesta i područja posebne prirodne osjetljivosti ili interesa.

(4) Interni i vanjski planovi intervencija moraju biti primjenjeni bez odlaganja u slučaju nesreća velikih razmjera ili u slučaju pojave incidenta koji bi mogao dovesti do nesreće velikih razmjera.

POGLAVLJE X - SISTEM EKO-OZNAČAVANJA

Član 103. (Sistem eko-označavanja)

(1) Sistem eko-označavanja uspostavlja se radi podsticanja izrade, proizvodnje, marketinga i upotrebe proizvoda sa smanjenim uticajem na životnu sredinu u odnosu na ukupan period trajanja tog proizvoda, kao i radi bolje informisanosti potrošača o uticaju proizvoda na životnu sredinu.

(2) Eko-oznaka se dodjeljuje proizvodima i uslugama široke potrošnje koji zadovoljavaju visoke standarde zaštite životne sredine u toku životnog vijeka proizvoda, naročito ako se njihovom proizvodnjom, odnosno pružanjem smanjuje potrošnja energetske resursa, emisija štetnih i opasnih supstanci, proizvodnja otpada i potrošnja prirodnih resursa.

Član 104. (Dodjela eko-oznake)

(1) Eko-oznaka dodjeljuje se na osnovu zahtjeva podnesenih od proizvođača, uvoznika, pružalaca usluga i trgovaca.

(2) Eko-oznaka se dodjeljuje proizvodima koji su proizvedeni i uslugama koje se pružaju u Distriktu u skladu sa ekološkim standardima, kriterijumima eko-oznaka uspostavljenim prema grupi proizvoda i usluga i osnovnim uslovima za zaštitu životne sredine.

Član 105. (Postupak dodjele eko-oznake)

(1) Postupak dodjele eko-oznake provodi nadležno odjeljenje.

(2) Proizvodi i usluge kojima se dodjeljuje eko-oznaka razvrstani su u grupe proizvoda i usluga.

(3) Uslovi korištenja eko-oznaka i oduzimanje eko-oznaka utvrđuju se ugovorom koji nadležno odjeljenje zaključuje sa podnosiocem zahtjeva.

(4) Postupak dodjele eko-oznake, izgled eko-oznake, grupe proizvoda i usluga, kriteriji za dodjelu prema uspostavljenim grupama i registar eko-oznaka, troškovi obrade zahtjeva za dodjelu eko-oznaka kao i nadzor korištenja eko-oznaka uređuju se Pravilnikom koji donosi Vlada na prijedlog šefa nadležnog odjeljenja.

Član 106.
(Odluka o dodjeli eko-oznake)

- (1) Odluku o dodjeli eko-oznake donosi nadležno odjeljenje.
- (2) Eko-oznaka dodjeljuje se na period od četiri godine.

Član 107.
(Registar eko-oznaka)

- (1) Odjeljenje uspostavlja i vodi Registar eko-oznaka.
- (2) Sadržaj i način vođenja registra iz stava (1) ovog člana uređuje se podzakonskim aktom iz člana 105. ovog zakona.

POGLAVLJE XI - FINANSIRANJE ZAŠTITE ŽIVOTNE SREDINE I EKONOMSKI INSTRUMENTI

Član 108.
(Sredstva za finansiranje zaštite životne sredine)

- (1) Sredstva za finansiranje zaštite životne sredine obezbjeđuju se iz:

- a) budžeta Distrikta;
- b) donacija;
- c) kredita ili međunarodne pomoći; i
- d) drugih izvora.

- (2) Sredstva za finansiranje zaštite životne sredine koriste se za:

- a) očuvanje, zaštitu i unapređivanje stanja životne sredine;
- b) učešće sa drugim nivoima vlasti u ispunjavanju obaveza Bosne i Hercegovine koje proizlaze iz međunarodnih sporazuma i sličnih akata, a tiču se zaštite životne sredine;
- c) sprečavanje štete ili otklanjanje posljedica nastale štete po životnu sredinu u slučaju kada se ne može utvrditi odgovornost za nastalu štetu;
- d) preduzimanje mjera u cilju unapređivanja zaštite životne sredine, kao što su razvoj sistema informisanja, istraživanje javnosti i druge aktivnosti za zaštitu životne sredine.

Član 109.
(Fond za zaštitu životne sredine)

Vlada može posebnom odlukom uspostaviti Fond za zaštitu životne sredine kojom će se utvrditi izvori sredstava i prikupljati namjenska sredstva za zaštitu komponenti životne sredine te način raspodjele i upravljanja takvim sredstvima.

POGLAVLJE XII - ODGOVORNOST ZA ZAŠTITU ŽIVOTNE SREDINE

Član 110.

(Aktivnosti na zaštiti životne sredine)

Pravno i fizičko lice dužno je da u obavljanju svoje aktivnosti osigura zaštitu životne sredine i to:

- a) primjenom propisa o zaštiti životne sredine;
- b) održivim korištenjem prirodnih resursa, dobara i energije;
- c) uvođenjem energetski efikasnijih tehnologija i korištenje obnovljivih izvora energije;
- d) upotrebom proizvoda, procesa, tehnologija i prakse koji manje ugrožavaju životnu sredinu;
- e) preduzimanjem mjera prevencije ili otklanjanja posljedica ugrožavanja i štete po životnu sredinu;
- f) vođenjem evidencije o potrošnji sirovina i energije, ispuštanju zagađujućih materija i energije, klasifikaciji, karakteristikama i količinama otpada;
- g) kontrolom aktivnosti i rada pogona i postrojenja koji mogu predstavljati rizik ili prouzrokovati opasnost po životnu sredinu i zdravlje ljudi; i
- h) primjenom drugih mjera u skladu sa zakonom.

Član 111.

(Odgovornost za štetu nastalu zagađenjem životne sredine)

(1) Za štetu nastalu zagađenjem životne sredine odgovoran je zagađivač, u skladu sa načelom iz člana 14. ovog zakona.

(2) Za zagađivanje životne sredine odgovornost snosi pravno ili fizičko lice, odnosno odgovorno lice u pravnom licu, koje je svojim činjenjem ili nečinjenjem izazvalo zagađivanje životne sredine.

Član 112.

(Naknada štete)

(1) Zagađivač koji prouzrokuje štetu zagađivanjem životne sredine dužan je preduzeti neophodne mjere radi smanjenja štete u životnoj sredini i uklanjanje daljih rizika ili opasnosti ili mjere sanacije štete u životnoj sredini.

(2) Ako se šteta iz stava (1) ovog člana ne može sanirati odgovarajućim mjerama, lice koje je prouzrokovalo štetu dužno je nadoknaditi prouzrokovanu štetu.

Član 113.

(Vrste troškova)

Troškovi preduzimanja mjera za smanjenje štete i troškovi saniranja nastale štete obuhvataju troškove:

- a) hitne intervencije;
- b) direktne i indirektno sanacije i uspostavljanja stanja prije nastanka štete; i
- c) naknade licima direktno pogođenim zagađivanjem životne sredine.

Član 114.

(Oslobađanje od odgovornosti)

(1) Pravno ili fizičko lice se može osloboditi od odgovornosti za štetu u slučaju da je zagađenje životne sredine nastupilo usljed:

- a) vanrednog stanja ili više sile;
- b) činjenja ili nečinjenja trećeg lica sa namjerom nanošenja štete;
- c) provođenja naredbi i mjera za sprečavanje štete većih razmjera.

(2) Lice iz stava (1) ovog člana može se potpuno ili djelimično osloboditi od odgovornosti za štetu, ukoliko dokaže da je primijenilo odgovarajuće mjere zaštite koje su okolnosti zahtijevale da bi spriječilo ili ublažilo štetu.

Član 115. (Osiguranje za štetu)

Operater odnosno pravno ili fizičko lice koje obavlja djelatnost opasnu po životnu sredinu dužno je putem osiguranja ili na drugi način osigurati sredstva za naknadu troškova iz člana 111. i 112. ovog Zakona i štete nastale zagađenjem životne sredine.

Član 116. (Primjena Zakona o obligacionim odnosima)

Na pitanje odgovornosti za štetu i naknade štete prouzrokovane životnoj sredini primjenjuje se Zakon o obligacionim odnosima.

POGLAVLJE XIII - NADZOR I PREKRŠAJNE ODREDBE

Član 117. (Upravni nadzor)

Nadzor nad provođenjem ovog zakona i podzakonskih akata donesenih na osnovu ovog zakona vrši nadležno odjeljenje.

118. (Inspeksijski nadzor)

Inspeksijski nadzor nad primjenom ovog zakona vrši inspekcija za zaštitu životne sredine.

Član 119. (Ovlaštenja inspekcije za zaštitu životne sredine)

U sprovođenju inspeksijskog nadzora, nadležni inspektor, pored opštih ovlaštenja propisanih Zakonom o inspekcijama Brčko distrikta Bosne i Hercegovine, ima ovlaštenje da naloži mjeru:

- a) otklanjanja utvrđenih nedostataka i nepravilnosti u radu postrojenja, koji za posljedicu imaju ili mogu imati zagađenje životne sredine;
- b) privremene zabrane obavljanja rada postrojenja ili obavljanja djelatnosti u proizvodnom postupku, koji za posljedicu imaju ili mogu imati zagađenje životne sredine, dok se nedostaci ili nepravilnosti u radu ne otklone;

- c) privremene zabrane korištenja uređaja i opreme, koji za posljedicu imaju ili mogu imati zagađenje životne sredine, dok se nedostaci ili nepravilnosti u radu ne otklone;
- d) privremene zabrane obavljanja djelatnosti u proizvodnom postupku, korištenje uređaja i opreme, koji za posljedicu imaju zagađenje životne sredine velikih razmjera;
- e) obustavljanja radova, ukoliko se radovi obavljaju na način koji nije u skladu sa uslovima utvrđenim u studiji uticaja na životnu sredinu odnosno u ekološkoj dozvoli.

Član 120.
(Novčane kazne)

(1) Novčanom kaznom od 10.000,00 KM do 100.000,00 KM više kazne kazniće se za prekršaj pravno lice koje:

- c) izgradi ili rukovodi radom postrojenja ili obavlja aktivnosti bez izrade Studije o uticaju na životnu sredinu odnosno bez pribavljanja ekološke dozvole iz člana 67. odnosno 77. ovog zakona;
- d) ne sprovodi mjere utvrđene ekološkom dozvolom iz člana 80. ovog zakona;
- e) ne obavlja praćenje na način propisan u članu 82. stav (1) ovog zakona;
- f) ne dostavlja nadležnom odjeljenju i inspektoru obavještenje o rezultatima praćenja iz člana 82. stav (3) ovog zakona;
- g) ne sprovede mjere utvrđene rješenjem u slučaju iz člana 85. stav (4) ovog zakona;
- h) izvrši promjenu prirode, funkcionisanja ili proširenja postrojenja suprotno odredbi člana 86. ovog zakona;
- i) ne dostavi podatke saglasno odredbama člana 93. stav (1) ovog zakona;
- j) ne sačini plan sprečavanja nesreća velikih razmjera iz člana 96. ovog zakona;
- k) ne dostavi izvještaj o stanju sigurnosti saglasno odredbama člana 97.;
- l) ne izvrši procjenu stanja kontaminacije tla i ne preduzme mjere zaštite životne sredine iz člana 99. ovog zakona;
- l) ne osigura sredstva za naknadu štete iz člana 111. ovog zakona.

(2) Novčanom kaznom od 1.000,00 KM do 20.000,00 KM kazniće se odgovorno lice za prekršaje iz stava (1) ovog člana.

(3) Novčanom kaznom od 1.000,00 KM do 10.000,00 KM kazniće se fizičko lice za prekršaje iz stava (1) ovog člana

DIO TREĆI - PRELAZNE I ZAVRŠNE ODREDBE

Član 121.
(Rok za donošenje podzakonskih akata)

(1) Vlada je dužna u roku od dvanaest mjeseci donijeti podzakonske akte propisane ovim zakonom.

(2) Šef Odjeljenja je dužan u roku od dvanaest mjeseci donijeti podzakonske akte propisane ovim zakonom.

Član 122.
(Primjena podzakonskih akata)

Do donošenja podzakonskih akata iz člana 121. ovog biće u primjeni postojeći podzakonski akti osim ako su u suprotnosti sa ovim zakonom.

Član 123.
(Započeti postupci)

Postupci koji do dana stupanja na snagu ovog zakona nisu pravosnažno okončani okončavaju se saglasno odredbama ovog zakona.

Član 124.
(Stavljanje van snage)

Stupanjem na snagu ovog zakona stavlja se van snage Zakon o zaštiti životne sredine („Službeni glasnik Brčko distrikta BiH", br. 24/04, 1/05, 19/07 i 9/09).

Član 125.
(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine".

OBRAZLOŽENJE

1. PRAVNI OSNOV:

Pravni osnov za donošenje ovog zakona sadržan je u članu 22. Statuta Brčko distrikta Bosne i Hercegovine - prečišćeni tekst („Službeni glasnik Brčko distrikta BiH“, broj: 2/10) i članovima 21. i 30. Zakona o javnoj upravi Brčko distrikta Bosne i Hercegovine – prečišćeni tekst („Službeni glasnik Brčko distrikta BiH“, broj: 25/20).

2. RAZLOZI ZA DONOŠENJE:

Zakon o zaštiti životne sredine („Službeni glasnik Brčko distrikta BiH“ broj: 24/04. 1/05, 19/07 9/09) donesen je 2004. godine i u njemu su postavljene osnove zaštite životne sredine u Brčko distriktu BiH, te isti predstavlja prvi zakon koji svojim odredbama sistematski uređuje zaštitu životne sredine radi očuvanja životne sredine, smanjivanja rizika po životnu sredinu i zdravlja ljudi i stvara osnove za poboljšanje životne sredine.

Ovaj Zakon prvi put je izmijenjen 2005. godine, radi preuzimanja pojedinih odredbi iz izvora EU *acquis* relevantnih za predmetnu oblast, i to Direktive o procjeni uticaja na životnu sredinu i Direktive o integralnom sprečavanju i kontroli zagađenja, čime je stvoren zakonski osnov za donošenje podzakonskih akata neophodnih za primjenu zakona, u dijelu koji se odnosi na procjenu uticaja projekata na životnu sredinu i izdavanje ekoloških dozvola za postrojenja. Na osnovu ovog zakona Vlada Brčko distrikta BiH je 2006. godine je donijela četiri podzakonska akta iz oblasti zaštite životne sredine, kojim se uređuje postupak i procedura izdavanja ekoloških dozvola, postupak i izdavanje ekoloških dozvola kako za nova postrojenja tako i postrojenja koja su izgrađena i puštena u rad prije stupanja na snagu seta Zakona iz oblasti zaštite životne sredine u Brčko distriktu BiH. Zakon o zaštiti životne sredine mijenjan je i dopunjen još dva puta, 2007. i 2009. godine.

Analizom vazećeg Zakona o zaštiti životne sredine Brčko distrikta BiH, uočeno da je osnovni problem zastarjeli pravni okvir, nepreciznost i nejasnoća pravnih normi i potreba za usklađivanjem sa EU zakonodavstvom, posebno sa Protokolom o strateškoj procjeni uticaja na životnu sredinu i Protokolom o registru ispuštanja i prenosa zagađujućih materija kao i Direktivi o industrijskim emisijama.

Posebni ciljevi koji se žele postići propisom su popunjavanje pravnih praznina, definisanje načela zaštite životne sredine, zaštitu komponenti životne sredine, definisanje obaveza Odjeljenja oko uspostave Sistema informisanja o životnoj sredini, učešće javnosti i pristup informacijama koje se odnose na pitanja životne sredine, definisanje procedure za izradu i donošenje strateških i planskih dokumenata, strateška procjena uticaja na životnu sredinu, definisanje postupka procjena uticaja na životnu sredinu, definisanje postupka objedinjavanja, obnavljanja i revizije ekološke dozvole u postupku izdavanja ekoloških dozvola, definisanje obaveza operatera, obaveza nadležnog odjeljenja, obaveza izrade Plana sprečavanja nesreća velikih razmjera i njegovog provođenja, te odgovornosti u slučaju nastupanja nesreća velikih razmjera, sistem eko-označavanja, finansiranje zaštite životne sredine i ekonomski instrumenti i odgovornost za zaštitu životne sredine,

Kao novina u odnosu na važeći zakona, ovim zakonom dodatno se preuzimaju odredbe iz direktiva Evropske unije a odnose se na: stratešku procjenu uticaja planova, programa i strategije na životnu sredinu, usklađivanje termina sa terminima preuzetim iz direktiva Evropske unije, preciznije se propisuje koji su poslovi i zadaci u vezi sa uspostavljanjem registra postrojenja i zagađivača. Pored toga, predloženim zakonskim rješenjima daje se veća mogućnost učešća javnosti u postupcima donošenja planova, programa i strategija, kao i konkretnih odluka koje se odnose na zaštitu životne sredine. Jasno je definisan postupak pribavljanja ekološke dozvole, kao i procedura obnavljanja i revizije izdatih ekoloških

dozvola. U skladu sa Direktivom o procjeni uticaja na životnu sredinu, zakonom su preuzeta rješenja koja se odnose na postupak sprovođenja procjene uticaja na životnu sredinu i postupak pribavljanja ekološke dozvole.

Analizirajući navedenu problematiku, obrađivač propisa je došao do zaključka da je realizacija utvrđenih problema i postavljenih ciljeva moguća jedino kroz donošenje novog propisa.

3. USKLADENOST ZAKONA SA ACQUIS EU

U skladu sa obavještenjem Odjeljenja za evropske integracije i međunarodnu saradnju, broj predmeta: 02-000140/23, broj akta: 18-1302MG-021/24 od 06.02.2024. godine u vezi provođenja postupka harmonizacije sa pravom EU navedeno je da je obrađivač propisa ispravno identifikovao izvore prava EU, koje će koristiti prilikom izrade prednacrtu Zakona, te da je djelomično preuzeo odredbe sekundarnih izvora prava EU i to:

1. Direktiva 2001/42/EZ Evropskog parlamenta i Vijeća od 27. juna 2001. godine o procjeni uticaja pojedinih planova i programa na životnu sredinu (*Directive 2001/42/EC of the European Parliament and of the Council of 27 June 2001 on the assessment of the effects of certain plans and programmes on the environment*, CELEX: 32001L0042;
2. Direktive 2010/75/EU Evropskog parlamenta i Vijeća od 24. novembra 2010. godine o industrijskim emisijama (*Directive 2010/75/EU of the European Parliament and of the Council of 24 November 2010 on industrial emissions*, CELEX: 32010L0075;
3. Direktive 2011/92/EU Evropskog parlamenta i Vijeća od 13. decembra 2011. godine o procjeni uticaja pojedinih javnih i privatnih projekata na životnu sredinu (*Directive 2011/92/EU of the European Parliament and of the Council of 13 December 2011 on the assessment of the effects of certain public and private projects on the environment*, CELEX: 32011L0092;.
4. Direktiva 2003/35/EZ Evropskog parlamenta i Vijeća od 26. maja 2003. godine koja predviđa sudjelovanje javnosti u izradi određenih planova i programa koji se odnose na životnu sredinu, te vrši izmjene i dopune s obzirom na sudjelovanje javnosti i pristup pravosuđu Direktive Vijeća 85/337/EEC i 96/61/EC (*Directive 2003/35/EC of the European Parliament and of the Council of 26 May 2003 providing for public participation in respect of the drawing up of certain plans and programmes relating to the environment and amending with regard to public participation and access to justice Council Directives 85/337/EEC i 96/61/EC Statement by the Commission*, CELEX: 32003L0035
5. Direktiva 2003/4/EZ Evropskog parlamenta i Vijeća od 28. januara 2003. godine o pristupu javnosti informacijama o životnoj sredini i ukidanju Direktive Vijeća broj: 90/313/EEZ (*Directive 2003/4/EC of the European Parliament and of the Council of 28. January 2003 on public access to environmental information and repealing Council Directive 90/313/EEC*, CELEX: 32003L0004.

Nadalje, istim obavještenjem Odjeljenja za evropske integracije i međunarodnu saradnju data je preporuka da obrađivač propisa prije usvajanja konačnog nacrtu propisa izvrši uvid i u sljedeće izvore prava EU:

1. Ugovor o funkcionisanju Evropske unije, Treći dio - Politike i unutrašnje djelovanje Unije, Naslov HH – Životna sredina, čl. 191 – 193 / (*Treaty on the Functioning of the European Union, Part three, Union Policies and Internal Actions, Title XX – Environment, Article 191 - 193*);
2. Aarhušku konvenciju (Konvencija o pristupu informacijama, učestvovanju javnosti u odlučivanju i pristupu pravosuđu u pitanjima okoliša;

3. Uredbu (EZ) br. 1367/2006 Evropskog parlamenta i Vijeća od 6. septembra 2006. godine o primjeni odredaba Aarhuške konvencije o pristupu informacijama, učestvovanju javnosti u odlučivanju i pristupu pravosuđu u pitanjima životne sredine na institucije i tijela Zajednice (*Regulation (EC) No 1367/2006 of the European Parliament and of the Council of 6 September 2006 on the application of the provisions of the Aarhus Convention on Access to Information, Public Participation in Decision-making and Access to Justice in Environmental Matters to Community institutions and bodies*), CELEX: 32006R1367;
4. Direktivu 2004/35/EZ Evropskog parlamenta i Vijeća od 21. aprila 2004. godine o odgovornosti za životnu sredinu u pogledu sprečavanja i otklanjanja štete u životnoj sredini (*Directive 2004/35/CE of the European Parliament and of the Council of 21 April 2004 on environmental liability with regard to the prevention and remedying of environmental damage*), CELEX: 32004L0035;
5. Direktivu 2008/99/EZ Evropskog parlamenta i Vijeća od 19. novembra 2008. godine o zaštiti životne sredine putem krivičnog prava Tekst značajan za EGP (*Directive 2008/99/EC of the European Parliament and of the Council of 19 November 2008 on the protection of the environment through criminal law (Text with EEA relevance)*), CELEX: 32008L0099;
6. Direktivu 2012/18/EU Evropskog parlamenta i Vijeća od 4. jula 2012. godine o kontroli opasnosti od velikih nesreća koje uključuju opasne tvari, o izmjeni i kasnijem stavljanju izvan snage Direktive Vijeća 96/82/EZ Tekst značajan za EGP (*Directive 2012/18/EU of the European Parliament and of the Council of 4 July 2012 on the control of major-accident hazards involving dangerous substances, amending and subsequently repealing Council Directive 96/82/EC (Text with EEA relevance)*), CELEX: 32012L0018;
7. Direktivu 2002/49/EZ Evropskog parlamenta i Vijeća od 25. juna 2002. godine o procjeni i upravljanju bukom iz životne sredine (*Directive 2002/49/EC of the European Parliament and of the Council of 25 June 2002 relating to the assessment and management of environmental noise*), CELEX: 32002L0049.

4. OBRAZLOŽENJE POJEDINIH ODREDBI

-Dio prvi-Osnovne odredbe (čl.1-čl.3) propisuje predmet Zakona, značenje pojedinih definicija i subpsidijarnu primjenu zakona.

-Dio drugi-Zaštita životne sredine (čl.4-čl.14) propisuje ciljeve Zakona i načela zaštite životne sredine.

-Poglavle II-Zaštita komponenti životne sredine (čl.15-čl.25) propisuje zaštitu komponenti životne sredine –voda, vazduh, zemljište na način da se koriste najbolje raspoložive tehnike.

-Poglavlje III-Informisanje i edukacija u oblasti zaštite životne sredine (čl.26-čl.29.) propisuje se sistem informisanja o životnoj sredini i prikupljanje informacija, mjerenje opterećenja i korišćenja životne sredine kao i saradnja, edukacija i koordinacija aktivnosti u oblasti zaštite životne sredine.

-Poglavlje IV-Učešće javnosti i pristup informacijama koje se odnose na pitanja životne sredine (čl.30-čl.38) propisuje učešće javnosti u postupcima donošenja odluka o životnoj sredini, pristup informacijama iz oblasti zaštite životne sredine, zabrana diskriminacije kod pristupa informacijama kao i način uspostave i vođenja registra zagađivača u kojima su prisutne opasne supstance.

-Poglavlje V-Planiranje i zaštita životne sredine (čl.39-čl.42) propisuje način izrade strateških planskih dokumenata.

-Poglavlje VI-Strateška procjena uticaja na životnu sredinu (čl.43-čl.55) propisuje postupak izrade strateške procjene, način provođenja, obim i sadržaj strateške studije, nosioca izrade i komisiju za ocjenu strateške studije. Kao i učešće javnosti u postupku usvajanja strateške studije.

-Poglavlje VII-Procjena uticaja na životnu sredinu (čl.56-čl.73) propisuje način provođenja postupka procjene uticaja na životnu srednu, pogone i postrojenja koja podliježu procjeni uticaja, obaveza izrade Studije o uticaju na životnu sredinu, sadržaj i odobravanje stidije, kao i prekogranični uticaj projekatana životnu sredinu.

-Poglavlje VIII-Ekološka dozvola (čl.74-čl.92) propisuje cilj i svrhu izdavanja ekološke dozvole, obaveze operatera u postupku pribavljanja ekološke dozvole, objedinjavanje ekološke dozvole, izrada Zahtjeva za izdavanje ekološke dozvole, održavanje javne rasprave, odbacivanje, odbijanje, obnavljanje, ponovno razmatranje i izmjene ekološke dozvole i objedinjavanje ekološke dozvole. Takođe se propisuje obaveza pribavljanja ekološke dozvole kod promjena u radu pogona i postrojenja kao i način vođenja registra izdatih ekoloških dozvola.

-Poglavlje IX-Sprečavanje nesreća velikih razmjera (čl.93-čl.102) propisuje obavezu operatera pogona i postrojenja koje može izazvati nesreće velikih razmjera, obavještavanje javnosti, izrada Plana sprečavanja nesreća velikih razmjera, interni i vanjski planovi intervencije i dostavljanje informacija o sigurnosnim mjerama nadležnom odjeljenju.

-Poglavlje X-Sistem eko-označavanja (čl.103-čl.107) propisuje način dodjele eko-oznaka, i vođenje registra eko-oznaka.

-Poglavlje XI-Finansiranje zaštite životne sredine i ekonomski instrumenti (čl.108-čl.109) propisuje način finansiranja životne sredine i uspostavu Fonda za zaštitu životne sredine.

-Poglavlje XII-Odgovornost za zaštitu životne sredine (čl.110-čl.116) propisuje način zaštite životne sredine, odgovornosti i naknadu za nastalu štetu, vrste troškova i osigiranje za nastalu štetu.

-Poglavlje XIII-Nadzor i prekršajne odredbe (čl.117-čl.120) propisuje inspekcijski nadzor i novčane kazne.

-Dio treći-Prelazne i završne odredbe (čl.121-čl.125) propisuje donošenje i primjenu podzakonskih akata i stupanje na snagu.

5. ANALIZA EFEKTA PROPISA

Predložena rješenja u prijedlogu ovog zakona djeluju na način da su pravna i fizička lica, odjeljenja i institucije dužna da se pridržavaju odredaba ovog zakona a sve u cilju zaštite i unapređenja zaštite životne sredine.

Na osnovu ekonomske procjene uticaja propisa, broj predmeta: 02-000140/23, broj akta: 13-1153PG-0007/23 od 31.08.2023. godine, utvrđeno je da realizacija propisa neće uticati na poslovno okruženje, da neće kreirati dodatna administrativna opterećenja, da neće uticati na rad malih i srednjih preduzeća i privrednika, i da neće imati uticaja na funkcionisanje tržišta i konkurenciju. Na osnovu procjene fiskalnog uticaja propisa, broj: 02-04.1-1063/23 od 30.08.2023. godine, utvrđeno je da je Direkcija za finansije Brčko distrikta BiH mišljenja da će se finansijski efekti utvrditi nakon izrade prijedloga propisa, s obzirom da je do sada finansiranje zaštite životne sredine vršeno isključivo iz budžeta i da su sredstva bila nedovoljna, da nije formiran Fond za zaštitu životne sredine, kao i potreba iznalaženja alternativnih izvora finansiranja.

U cilju kvalitetnijeg provođenja aktivnosti procjene uticaja i utvrđivanja kvalitetnih mogućih opcija, analize stanja, utvrđivanja problema, te iznalaženja najpovoljnijih rješenja, obrađivač propisa je izabrao pisane konsultacija, sa odjeljenjima i institucijama Vlade Brčko distrikta BiH kao i objavljivanjem na internet stranici Odjeljenja, kao najpovoljnije rješenje.

6. PROVEDBENI MEHANIZMI I NAČIN OSIGURANJA POŠTOVANJA PROPISA

Odjeljenje za prostorno planiranje i imovinsko-pravne poslove će primjenjivati propis prilikom vršenja poslova iz svoje nadležnosti, dok će kontrolu primjene vršiti Inspektorat Brčko distrikta Bosne i Hercegovine u okviru svojih nadležnosti.

7. PROCJENA FINANSIJSKIH SREDSTAVA POTREBNIH ZA PROVOĐENJE PROPISA

Procjena finansijskih sredstava potrebnih za provođenje propisa moguće je utvrditi nakon određenog roka njegove primjene.

9. OPŠTI INTERES ZBOG KOJEG SE PREDLAŽE POV RATNO DJELOVANJE

Nacrt propisa ne sadrži odredbe s povratnim djelovanjem.

10. RAZLOZI ZA DONOŠENJE PROPISA PO HITNOM POSTUPKU

Ne predlaže se donošenje zakona po hitnom postupku.

11. RAZLOZI ZBOG KOJIH SE PREDLAŽE STUPANJE NA SNAGU ZAKONA PRIJE OSMOG DANA OD DANA OBJAVLJIVANJA U SLUŽBENOM GLASNIKU BRČKO DISTRIKTA BiH

Ne predlaže se stupanje na snagu zakona prije osmog dana od dana objavljivanja u Službenom glasniku Brčko distrikta BiH.